

نبيل عبد الحميد

أهرام الجمعة

ديوانه بالقاهرة المصرية



دار العلوم للنشر والتوزيع

اسم الكتاب : أهرام الجمعة

اسم المؤلف : نبيل عبد الحميد

الطبعة الأولى : يناير ٢٠١٥

تصميم الغلاف : أحمد فرج

مدير النشر الأدبي : سيد شعبان

التنسيق الداخلي : رفعت حسن سيد

دار العلوم للنشر والتوزيع

ص . ب : ٢٠٢ محمد فريد ١١٥١٨

هاتف : ٠١١٤٤٧٦٤٠٠٠

الموقع الإلكتروني : www.dareloloom.com

البريد الإلكتروني : daralaloom@hotmail.com

[Facebook.com/dareloloom](https://www.facebook.com/dareloloom)

Twitter : @dareloloom

جميع الحقوق محفوظة

رقم الإيداع : ٢٧٢٣٩ / ٢٠١٤

الترقيم الدولي : ٩٧٨-٩٧٧-٣٨٠-٤٢٣-٧

دار
العلوم
للنشر والتوزيع

إن الآراء الواردة في هذا الكتاب لا تعبر بالضرورة عن رأي دار العلوم للنشر

يمنع نسخ أو استعمال أي جزء من هذا الكتاب بأية وسيلة تصويرية أو إلكترونية أو ميكانيكية
بما فيه التسجيل الفوتوغرافي والتسجيل على أشرطة أو أقراص مقروءة أو بأية وسيلة نشر أخرى
بما فيها حفظ المعلومات، واسترجاعها من دون إذن خطي من الناشر

مقدمة

كتب : نبيل عبد الحميد

للمرة الثانية - محمد الله - أجلس لأكتب مقدمة لديوان جديد ، و مع ذلك لم أتخلص من ذات التوتر الذي صاحني قبلاً في الإعداد للديوان الأول .

الحقيقة ، أنني بالفعل لم أكن أتخيل ردود الأفعال الرائعة سواء كانت إعجاب بالمتحوى ، أو كانت نقداً هادفاً نبهني بتقصيري في بعض النقاط . كما أنني لم أكن أعلم أن الأيام تمر بتلك السرعة التي ما زالت تُشعرنني بأنه لم يمض سوى بضعة أسابيع على إصدار الديوان الأول .

لا أدري ، هل صرت أنا اليوم أكثر حكمة أم أكثر جنوناً ! أكبر عمراً أم أكبر طموحاً ! أنا هو أنا ، وذلك الذي سترأه الآن قد يختلف عن سابقه في النواحي الفنية و التفاصيل ، ولكنه أبداً لن يختلف عنه في الروح .

أعتقد أنك لا تحتاج إلى أن أذكرك بأن تجعل هذا الكتاب قريب من يدك ، وكلمة وقعتليه

عينك فلتناوله و تقرأ قصيدة . أنا ، و يأتي برفقته العديد من الملاحق أعدك بمفاجأة جديدة في كل مرة . المتخصصة أيضاً .

ربما قد تختلف رؤيتك تماماً لهذا المحتوى إذا تغيرت وجهة نظرك إليها ، لذا ، اقرأ الكتاب و أنت على ثقة بأن هناك العديد من الرسائل لمرسله إليك بالتحديد . و سنكتشف الكثير حتماً .

أرجو أن أكون قد وفقت في تقديم محتوى جيد يتفوق على سابقه . كما أتمنى أن يساهم هذا الكتاب في إحياء أي جانب إيجابي من جوانب النفس ، أو يساهم في ضحكة مُصاحبة لذكرى قديمة ، أو تنهيدة تطرد عوادم الأمل المحترق .

عن أهرام الجمعة

(تنهيدة طويلة) - كانت أيام رائعة . ما زلت أذكر بالتفصيل تلك الأيام بصحبة ذلك العدد الأسبوعي من جريدة الأهرام والمعروف بإسم "أهرام الجمعة" .

كان ذلك العدد هو أفيونة يوم الجمعة التي لا يكتمل اليوم بدونها . العدد يكتظ بالعديد من الأبواب الشيقة

لماذا أهرام الجمعة ؟
لا أعرف السبب ، ولكن يكفي أنه جعلني حتى الآن ما زلت أعشقه و أشتاق إلى أيامه التي كان شاهداً فيها على كل لقطات عمري في تلك الفترة .

المحرر
نبيل عبد الحميد

الإهداء

على فكرة أنا مه زمان وأنا نفسي أهديك هاجت
وبصراحة قلت أنتهز الفرصة دي وأفرحك ..
علشان أنا عارفة إن الإهداء لما بيفرح بيكون
قادر إنك يفرح كل الناس هوالله ..
وهعوده المطلوب
علشان كدة .. أتمنى قبول الإهداء ده مني ..
الهداء .. مع فالك الورد ..
إن .. نبيل عبد الحميد

نبيل عبد الحميد

مُلحق رسايل للأبد . .

جدول بمواعيد الصُدَف

بوستر و فيه بنت و ولد . . .

و خريطة الروح

و البلد . .

و مدد مدد . .

جُوّه العدد . .

يا شوارع زحمة الصُّبحية . . و يا رزقِ يحب الخفية . . أنا شامم ريحة
طعمية . . ما تجيبوا قرصين . .

هنفضل تمَلِّي بنشبه لبعض . . تشابه أسامي و تشابه ظروف . . بنبعد و
نرجع نصفِّي إللي بيننا . . ونشك بواقِي النُقْط و الحُرُوف . . بتركن عليا
و تسند كتافك . . و أنا فعز ليلي بعينك بشوف . .

تعكِّز عليا . . و أعكِّز عليك . . و تضحك في وشي . . برغم إللي
فيك . . نفضفض لروحنا . . نلصم جُروحنا . . و تستقوى بيآ . . و
بستقوى بيك . .

أشيل حمل عنك . . عشان ماتشيلوش . . تشيل سري عندك . . ولا
بتقولوش . . بنرضى بـ ماجالنا . . ولا فـ يوم سألنا . . مين فينا عنده . . و
مين معاهوش . . و بين الوشوش تلقى مليون علامة . . في طيبه و
شهامة . . و حلفان و وعد . . هنفضل تمَلِّي بنشبه لبعض . .

يا أهلي و قرابي . . و صُحبة زمان . . يا ساكنين شارعنا . . و عشرة
مكان . . يا كل إللي شكلي . . و عايشين مشاكلي . . زمايل مدارس . .

زمايل ميدان .. بخاف ع إللي بيننا .. وأخاف ع إللي منا .. وأخاف م
المخبي .. و شر إللي بعد .. و بتمنى نفضل بنشبه لبعض ..

يادوب ٤ حروف

هُمَا يادوب .. أربع حروف .. تفتح قلوب الناس .. تَقْفِلِ بِيان
الْحُوف .. أربع حروف هُما الدوا .. بما إنا عايشين سوا .. نفس
الظروف .. جَرَّب وشوف ..
قولهم لِكُلِّ اللّٰي مِشِي .. معاك الطريق .. قولهم لِكُلِّ اللّٰي وَقِفِ ..
جنبك في ضيق .. ولكل لحظة عشتها .. مع كل حابه عشتها .. بحق
و حقيق .. ولكل لحظة طبطبة .. فوق الكفوف .. جَرَّب
وشوف .. كلمة " بجبك " كلها .. أربع حروف ..

جَدَعِ عِترَه

بتجمعنا البيوت عيله
و تجمعنا الشوارع أهل ..
كتافنا بتقسيم الشيله
و كل الصعب يصبح سهل ..
في ضيل العشره و الجيره
كبرنا ويا بعض إخوات ..
شهامه و باقيه في السيره
حكوها جدودنا في الحكايات ..
جَدَعِ عِترَه و متأصل
بشوفه ما بين وشوش الناس ..
بياض القلب متفصل
على الكف اللي كله حماس ..
قابله مره في الشارع
يادوب قبل الأدان بمفيش ..
حلف لازم معاه أفطر
برغم إنه ميعرفنيش ..
و مره حاسيلي ع الأجره
عشان الفكه مش كافيه ..
نزل قبلي و راح ماشي
و سابلي ضحكته الصافيه ..

بشوفه صنايعي في الحارة
و ترزي حريمي ع الشارع ..
و بياع فُل في إشاره
و دُفعه من الحدود راجع ..
وشوشنا كلها واحده
بنشبه بعض لون و ظروف ..
نفوسنا بالنصيب ترضى
و بيننا الطيبه و المعروف ..
يا صاحب عُمري يا ضهري
رفيقي فد كل مشواري ..
معايا تملّي ع الدوغري
و كاتم كل أسراري ..
تُقف جنبي و تفرحلي
في وقت الفرحة ما بتحصل ..
و في الشدّه بتسبقني
و توصل قبل ما بوصل ..
جدّع عتره و متأصل
بشوفه ما بين وشوش الناس ..
بياض القلب متفصل
على الكف اللي كله حماس ..

حمادة

كان محبوس
جُوهَ مكان ضيق و مضلّم ..
و لا كان عارف يفرد رجله
و لا قادر ينطق يتكلّم ..
و مفيش عنده حل بديل
فاضل ليله يدوب هتعدّي
و هيبجي معاد الترحيل ..
رافض هو يسبب زنزانته
إللي سِكنها لوقت طويل ..
عدّي الوقت و عدّي الليل ..
سامع دوشة و سامع ناس
سامع صوت بيقول و يردد
هانت باقي دقيقة خلاص ..
طالع هو من الزنزانة
من غير لّمه و لا حُرّاس ..
كان مشدود ..
ساب لعنيه الفرصة تعييط
أول مرّه يكون مخضوض .
حَسْ إيدين حوالية بتططب
حاول يعرف مين موجود !
سامع أبوه بيبارك ل أمه
- مبروك لسلامة المولود ..

على ذِكرِكَ

على ذِكرِ الهوى و الليل
و ذِكرِ المُشتاقين ع الأرض ..
و حُضن غيايبي كان سُنّه
و كان واجب وجوب الفرض ..
على ذِكرِ الحساب
و العرض ..
و ربط الفرد بالمجموع ..
و ذِكرِ الوحدَه في اللمة
و ذِكرِ الفِكر في الموضوع ..
عن الذِكرِ إللي كان ممنوع
عنيكي
و أي شئ من بَعْد ..
لقيت نفسي بقول إسمِكَ
على ذِكرِ المجاز و السرد ..
بقيت من يومها درويشِك
و ذِكرِكَ عندي أصبح ورد ..

الشفرة لا تزال في جيبي

عشان الرقابه..
و مادة (٨) - بشأن الكتابه ..
بشأن اللي حاصل
و شأن الغلابه..
عشان الرتابه
هنكتب بشفره..
- و صوت ضحكة صفرا-
نبدل كلام في الكلام و السلام
نحط و نشيل..
بدال "مستحيل"
نقى نكتب "أكيد" ..
و نكتب "قريب"
بدال الـ "بعيد" ..
و نعكس كلامنا القديم في الجديد..
و نقدر ساعتها نقول المعاني
و أقعد مكانك
و تقعد مكاني..

محدث هيعرف
يجيب معنى تاني..
ولو حتى قرّر
يعيد أو يزيد..
و فكر يفسر كلامنا المشقر
في "بكره إللي أجمل .. قريب .. أكيد" ..

يجوز بُكرة

بقالي كثير
بحاول إني أتغير
و أقول بُكره ..
هكون أحسن من الأول
و مين يكره ..
و مين محاولش ..
و عدى عليا ميت بُكره
و أنا برضه مابتغيرش ...
بفكر
بس مابقرش ...
لكن دلوقتي أنا ناوي
و عندي الوقت و الفكرة ...
مقرر إني هتغير
و هبدأ ..
بس من بُكره ..

- تلتين حَسَد و التلت .. حَرَزَة في باب بيثهم ...
تلتين خطاوي و شقى .. و التلت جاب فوتهم ...تلتين يا قوتهم ..
(التفاصيل ص ١٨)
- و برغم الزحمة على الشاشة ..
م الوحدة نموت .. و الوقت يفوت .. و تعدي ساعات ..
(التفاصيل ص ٢٠)
- مضطر تكمل من غيري ...
يُحكى أن .. نام في سريري ..
(التفاصيل ص ٢٢)
- و بتاع الشاي .. بيضب الصر ف خمسينه ..
و يلف على الخلق يفرق .. و غريب السوق جاي يسترزق
(التفاصيل ص ٢٤)
- آخر خير ..
الشنطة مش قد السفر .. و الذنب مش راح يُغتفر ..
(التفاصيل ص ٢٥)

التلت و التلتين

سَمُّوا الحاجات ثلاثات
تلتين و تالتهم ...
تلتين في غربه و تلت
قاعد في صُحبتهم ...
تلتين حَسَد و التلت
حَرْزة في باب بيئهم ...
تلتين خطاوي و شقى
و التلت جاب قوتهم ...
تلتين يا قوتهم
و التلت كان غلبان ..
تلتين جعان ميت
و التلت بات شبعان ..
تلتين - كِمالتهم
في التلت بالنقصان ..
يا قِسمة الأحزان
تلتين سنين ثَوَّهان
و التلت في القبله ..

تلتين شوارع سدّ
و التلت كان مِخله ..
ما تساوي غير نِكله

يا دُنْبة المساجين ..
تلتين مدد و عتاد
و التلت بني آدمين ..
لو جابسيوهُ ب تلت
يلقى الدروع تلتين ...
تلت السنين ب سنين
تلت السنين
ب سنه ...
تلت الثلاثة بكام
تلت الثلاثة أنا ...

إنبوكس

بنسيب الدنيا الحقيقية
و نعيش في شاشات ..
بقى كل كلامنا و حكاويننا
إنبوكس و شات ..
و بنشكي من الحال المايل
و نفضفض بحروف في رسائل
و نعبر بإيموشن صامت
وسكات في سكات ..
يا خسارة
و يا ألف خسارة
ع اللمة زمان ..
على حاجه كانت بتجمّعنا
كلنا في مكان ..
على سهرة عيلة و حكاويها
و الضحك اللي بنضحكه فيها
دلوقتي بقينا نقضيها
إنبوكس و شات ..

عائشون نندارى ورا الصُورة
و كاتمين الصوت ..
و برغم الزحمة على الشاشة

م الوحدة نموت ..
و الوقت يفوت
و تعدّي ساعات ..
و الباقي ما بين الناس في الشات
حبة حكايات
و الباقي ما بين الناس فعلاً
كان قلب و مات ..

يُحكي أن

يُحكي أن
كان يسنّئى أيام و ساعات
كان يسنّئى بالأسابيع ..
يُحكي أن
كان يبيع ..
كل الماضي بكل الجاي
باع للكر
شرب الشاي ..
ويّا القهوة و النيكوتين ..
يُحكي أن
كان مسكين ..
مش عارف أصلا يتمنى ..
يُحكي أن
أن الجنه
فيها من كل
ما هوّ جايز ..
لكن جنة أرضك جايز

تَدْخُلُ تَكْسِبُ فِيهَا جَوَائِزُ ..
يُحْكِي أَنْ
كَانَ مَشَّ عَائِزُ ..

غَيْرُ بَسِ يَادُوبُ يَمْسِكُ نَفْسَهُ
يُحْكِي أَنْ
عِزَّةَ نَفْسِهِ
هِيَ إِلَّي جَابِتْلَهُ الْقَوْلُونَ ..
يُحْكِي أَنْ
كَانَ مَجْنُونُ ..

...

قُتِمَتِ قَلْبَتِ التَّلِيفِيزِيونِ
بَعْدَ مَا نَامَ جَوَائِيا ضَمِيرِيونِ ...
أَنَا أَسْفُ وَاللَّهِ يَا صَاحِبِ
مُضْطَرِ تَكْمَلُ مِنْ غَيْرِيونِ ...
يُحْكِي أَنْ ..
نَامَ فِي سَرِيرِيونِ ..

السوق

السوق زحمه
و فصال و صداع ..
شاري و بياع بينهم موازين
و كفوف أوجاع ..
و بتاع الشاي
بيصّب الصبر ف خمسينه ..
و يلف على الخلق يفرّق
و غريب السوق جاي يسترزق
إيه جابك سوقنا يا بلدينا ..
دا الرزق يادوب أد الفرشه
و القويّه يادوب بتكّينا ..
خلينا نسدد ما علينا
و نربي ولادك و ولادي ...
أنا واقف ع الفرشة بنادي ...
تفاح بلدي - بطيخ بلدي
في بلاد مابقيتتش شبه بلدي ..
و تعالى و دوق ...
حمرا يا أوطه - طازه يا برقوق
كان نفسي تكون حاجة يا ولدي
و أشوفك فوق ..

آخر خبر

كل اللي رجعوا م الطريق تابوا ..
كل إللي رجعوا م الزمن شابوا ..
قضّاهم مشي سنين على كعابه ..
و أهو جاى بيحكي ع القضاء
و على القدر ..
آخر خبر
قبل الأخير ..
الدنيا مش دائماً حريير
ولا كل ما بيحصل أذى
ولا كل ما بيحصلش خير ..
و إنت إللي زيك مش كثير ..
"ليس العجولُ كمن صبر" ..
آخر خبر ..
الشنطة مش قد السفر ..
و الذنب مش راح يُغتفر
و إن العقر ..
ما بقيتش قادرة تمنعه ..
آخر خبر
هيكون خطر ..
أخطر خبر راح تسمعه ..

- قضي الوقت بطوله يدافع .. لجل يلاقي دليل إثبات .. و أما القاضي حكم بيرانئه .. كان العُمر عملها و قات !
- - حقيقي؟ .. - مؤكد .. - ما يمكن ! .. - يجوز .. - هينفع؟ .. - نجرّب .. - هتخرّب .. - تَبَوط .. - هنخسر .. - ما نخسر .. - و بعدين؟ .. - نفوز ..
- من الخنفة .. و ضيق أفقي .. بروح مرمي .. و أنام أفقي .. و أروح في النوم .. تطاردني .. و أفلها .. تواربني .. تحاربني في أحلامي .. و تستحضرلي روح يآسي .. ساعتها حلفت لـ أتمرّد .. و من يومها بنام رأسي ..
- فين الطريق يا خال ؟ .. قال الخطاوي ثقال .. و السكّة ليه بتضيق .. قال زادت الأحمال .. فين الطريق يا صديق .. قال الطريق بطال .. و إزاي هنمشي يمين .. و اليافاطة سهم شمال .. سعر الضمير بجنه .. سعر الأراضي عيال .. كام الحساب يا خال ؟ ..

ساب العلام مُجِر .. مالحقش يتعلّم .. و ما نابه غير جهله .. و الرقص ع السلم ..

كُنَّبَ : من لم يمُت بالغير

يرقص ساعات .. و ساعات .. يصرخ و يتكلم .. مالك كده مِضْلَم .. صوتك بيتألم .. سَلَم أمور الهوى .. للصدفه و التخاطيف .. و ادعي و قول يارب .. هات المُخبي لطيف .. من لم يمُت بالغير هيموت بحد السيف .. ورق الليالي خفيف .. و العُمر فصل خريف .. عايش كيف بيشوف .. ما لا يرى الشايفين .. شاف الطريق محدود .. مسدود من الطرفين .. شاف ع الشجر محفور .. سهم إغتصب حرفين .. و أنا و إنتي مُختلفين .. لكن هنهرب فين .. مين فينا مختار مين .. مين فينا متألم .. إنتي السطوح و البوح .. و أنا لسّه ع السلم .. عيّل ضعيف جاهل .. مالحقش يتعلّم ...

■ و بيوت مسنوده و مكفيه .. ورا بعض طابور ...

جواها كلام .. و رؤى و أحلام .. و روايح بُن .. و عطر بخور ..
(التفاصيل ص ٣٠)

■ و عشان تعيش وسطهم

لازم تكون شيال ..

(التفاصيل ص ٣٢)

■ بنفخ في الغريب خايفين

بييجي قريب بيلسعنا...

(التفاصيل ص ٣٨)

■ يا تعميره .. علي جوزه عجوز الحي ..

طفي فحمك بيستنى .. واحد غايب .. لكن مش جي ..

(التفاصيل ص ٤٣)

حارة الأموات

الناس نامت
و الحارة بقت مشهد ثابت
و الليل محاصرِها لكن ساكيت
على كُلى خفايا الشبايبك ...
يسئُر حكايات
و حنين و حاجات
و أنين و صراخ أوتار و نايات
يسئُر على دمع بيتسريب
على حوش الدار ..
يسئُر أسرار ..
مكتوبه ف وصفة عطار
و حجاب مسحور ...

عمدان النور
مَظفِيه ف شارع مهجور ..
و العتمة تحاوط مداخلها
و تداري السير
و تَكفي ماجور ...

لمبات مكسورة و مطفيه
صوت الصراصير في الخلفيه

و بيوت مسنوده و مكفيه
ورا بعض طابور ...
جواها كلام
و رؤى و أحلام
و روايح بن
و عطر بخور ...
و هموم بالدور
مقسومه حصصها على بيات ..
و كفوف الدم على الحيطه
خمسات خمسات ..
جوه الجدران براويز و صور
أحاديث و آيات ..
جوه الجدران الناس أموات ..
الناس أموات ..

الشيال

و نَحْفَ إِيه تَانِي ؟
جِمل المِشال إِتْشال ..
ماهو يانْت تِسْتَرِجِل
يا هنْطَلع إِحنا عِيال ..
مِين كان يَقول إِنْكَ
لا لَابوك و لا لَعْمَك
طالِع يا واد شِيال ..
طَب ساعَة الأَحمال
راح تَعْمَل إِيه يا خَفِيف
دا الجِمل طوب قاسي
و إِنْنا حِيالِله ضَعِيف ..
و الطَقْمِله نَضِيف
من طَرِطْشَة بُكْرَة ..
و إِنْت مَش أبو العُرَيْف
و مَفِيش حِداك فِكْرَه ..
لا عَرَفْت يَوْم تَعشِق
و لا تَانِي يَوْم تَكْرَه ..

إيدك علي الأوكره
و إفتح و شوف الناس
مين إللي داس و إنداس

بين العمم و الشوم ..
كام حر عاش ظالم
كام عبد مات مظلوم ..
دي الناس ماليها هموم
باينه على الأحوال ..
و عشان تعيش وسطهم
لازم تكون شيال ..

الناس حكايات

لَخَّصَ حكاياتك في حكاية
مين عنده الوقت هيسمعلك ..
مين شاغل بأله بحواديتك
عن ناس بتروح و بترجعلك
مين يقدر فينا يرَجِّعْلك
القطر إللي عملها و فاتك
الناس مليونه كلام و حاجات
و محدش فاضي لحكاياتك ..
فد بلاش تحكيلهم و حياتك ..
ع البننت إللي زمان حبيبتها
و إزاي كانت فاهمك جداً
و إزاي بعد دا كله نسيته ..
و السكة الضلمة إللي مشيتها
مع صاحب سوء
و إزاي كان بيَقْضِي السهره
من غير ما يفوق ..
و إزاي خُلك جربت تدوق ..

و إزاي .. و إزاي
و هتفضل تحكي و تتحاكى

مع قهوة ف قهوة ف قهوة ف شاي
ما تسيبك م الماضي الفايث
خليك في الجاي ..
و إن كان ولا بُد إنك تحكي
و تفضفض كام ساعة معايا ..
أرجوك من قبل ما نتكلم
لحّص حواديتك في حكاية ..

عند اللزوم

و ع العلبه
تشوف إسمك هناك مكتوب
حُقن / كبسول
شراب وحبوب ..
يادوب أصبحت تركيبه ..
بكام ميزة
و كام عيبه ..
و كام في الميه فيك طيبه ؟
و كام في الميه فيك إسود .
و كام الجرعه للبالغ
عشان يدمن و يتعود ..
و تتكود بكود سيريال
و تاخذ ع الرُفوف رفق ..
و تستنى طابور مرضى
لحد ما يصرفوا صقك ..
و ياخذك هو من كقك
يلقك ويا ذول فى الحال ..

شريط كيتوفان / Rx

مُهَدِّي سَعَال ..

حُرُوف إِسْمِك

و كُونِجِسْتَال ..

و كَيْس و فَاتُورَه و رُوشْتَه

تُرُوح لِمَرِيض مَرَض بَطَال ..

فَ يَأْخُذ نَشْرَتِكَ يَقرَا

أَنَا – و دَوَاعِي لَ إِسْتِعْمَال ...

باب الريح

يا باب الريح
جينا لك م السفر مجاريح
أمانه عليك
ما تتسدّش ...
جيناك في النور
بروح شايبه و عود مكسور
معانا حمول
ما تتعدّش ..
محدّش في الفضا ساعنا
بننّفخ في الغريب خايفين
بييجي قريب بيلسعنا ..
و ما يساعناش ...
نقابل في الطريق لعنه
و ما نشوفهاش ...
حلّما كثير بخير
و مجاش ..
و مقدرناش نصّد الريح
جينا لك
م السفر مجاريح ..

بين الطبيب و الدوا

بين الطبيب و الدوا
شُفْتُكَ مريض فبكيت ..
و حلفت نبقى سوا
سببت إللي عندي و جيت ..
و ما بين بُكايا دَعَيْت ..
بيجي إللي فيك فَيَا
و إنت تعيش مرتاح ..
دنا ليا ياما معاك
عِشْرَه و فَرَح و بَرَّاح ..
يا صبر يا مُفْتاح
هَوْن علينا الجاي
و إزاي هعيش إزاي
و أنا لَمَّا شُفْتُهُ بكيت ..
و ما بين بُكايا دَعَيْت ..
يارب بعد الدوا
نرجع سوا ع البيت ..

بالعجب

عارفين ؟ ..
إن الحنين
مالهوش وطن ..
يعني السنينفي السجن
عند إلتسجن ..
مش محسوبين
عُربة و شجن ..
و لا مشطوبين
م العُمر و سنين اللُقا ..
و ده ليه بقا
علشان حنين الروح
بيروح
دايماً لتفاصيل المكان ..
و إن كان مكانكملم يَكُن
ناطح سحاب ..
أو كان جيرانكملم تَكُن
أهل و صُحاب ..

أَوْ حَتَّى زَادَكُمْ
عَ الْحِسَابِ ..
رَغْمَ الْعَذَابِ - يَا لِلْعَجَبِ

دَائِمًا يَحْنُوا بِدُونِ سَبَبٍ ..
تَتَنَهَدُوا ..
تَتَهَيَّدَةُ الْمَحْرُومِ سَكَنٌ
فَاتَتْ سَنِينُكُمْ إِتْحَاصِنَ ..
فَالْحُضْنَ بِالنَّسْبِ أَلَهُ كَانَ
هُوَ الْوَطَنُ ...

تايهين

ماشيين مش عارفين فين ..
و لا داريين باللي بيحصل ..
و بنسأل ناس تايهين ..
علشان مش عايزين نوصل ..
و بنرجع تاني بنسأل
على شارع مش بيوڊي ..
لمحطه مهيش موجوده
فيها قطر مهوش هيعدي ..
لما مايوصلش يفضي
الناس الـ مش راكبين ..
ينزلوا على الخط الراجع
علشانهم كانوا رايعين ..
و إحنا وصلنا على الـ رايع
نستني الـ مش جاين ...

كلام في الفايث

يا لَمَه ف وسط صاله زمان
خسرتاكم مكان و حُضور ..
يا راديو مُسلسل السهرة
وحشني الإيريال المكسور ..
يا عيله و أهل - يلجيره ..
خسرتا ضحك أيامكم
و كل الباقي تكشيرَه ..
يا تعميره
علي جُوزة عجوز الحي ..
طَفَى فحَمِك بيستنى
واحد غايب لكن مش جَيّ ..
مهوش مَيّت - ماهوآش حى ..
و لا بيستجدي ذكراكم
مفيش فيه حاجه فاكراكم
بينساكم واحد واحد
و كُله جاي عليه الدور ..
يا لَمَه و صُحبه - يلجيره ..
أمانه تَغَيروا السيره
و تَكفُوا ع إللي فاتنا ماجور ..

الموجة الثالثة

الصوت اللي بيطلع لَمَا
بتأف البَكَرَه و بتقلّب
و تغيّر من موجه لموجه..
وشششششش
الراديو أساساً بيّوش
لو راس الإيريال معووجه..
و خصوصاً
مع أول موجه..
و البحر معاك مد الشوف..
المشهد في الموج العالي
شئ تاني - غير المألوف ..
دوّرت تشوف حواليك حاجه
تتعلق فيها من الدنيا..
عدّيت الموجه لقيت نفسك
برنامج ع الموجه التانيه..
بتقلّب - و الراديو يوّش..
وشششششش

الآن مع فقرة - "معلش" ..

-أنا آسف حقك على راسي

-

كان ممكن بس على عنيا..

-أنا فاكروعدك

-وانا ناسي

معلش ياريت كان بايديا..

-الصوره بتشبهه ؟

-مش هيا..

-الإسم مُشابه

-كان غلظه..

-تتصلح ؟

-في الموجه التالته..

و تلف البكره

وششششش..

صوت مش واضح

و الراديو يوش..

الفرصه أهى طارت م العيش..

مابقاش لك وش..

وششششش..

الراديو بتاعكم بيغش..

لم ينجح أحد

زمان في المدرسة كنا
لا بنذاكر
ولا بنلحق..
نراجع حاجه في الآخر
و في الآخر
نجيب ملحق..
نعيد الماده م الأول..
و بنذاكر و بنطول..
تقوم الكحه تتحوّل
تكون دگه في فصل جديد..
و دلوقتي مع الدنيا
أنا ساقط
و عايز أعيد..
فجيت أسأل على المواعيد
و إمتى الإمتحان الجاي..
ذاكرت العُمر م الأول
أعيده إزاي؟..

فُلان إنت

حاولت تكون فُلان تاني
حلمت تكون جرندايزر..
حلمت ب بدلة و ب شنطة
و ميديكال ريب من فايزر..
حلمت تكون سوبرفايزر
فشلت ف كل أحلامك..
لقيت عرّافه فُدامك
و قالت
أدّ ما قالت..
حاولت تكون فلان تالت..
سيجار - ولّاعه - كرافته
دا فاضل ع الستار حتّه..
فَ لو حابب تأدي الدور
ياريت حاول
تكون إنتا..

و باقي مفيش ..

- و باقي ف جُزء من ذهني .. حاجات كانت بتشبهني .. بواقي الذكرى تندهنى ..
تقوللي معاك - أقول معايش ..
- باقيلي في الجيوب مليم .. و كام كلمه في تتر قديم .. و غنوة من أغاني حلیم
.. و زهر جابيلي يك و شيش ..
- و باقي من الطريق مشوار .. و باقي من الحبايب دار .. و باقي من إللي مات
أسرار .. و باقي من إللي طار الریش ..
- و باقي من السطوح خزآن .. و ديك بينادي كل أدان .. و طيف عابر لـ بنت
جيران .. و سور خُلاها ماتشوفنیش ..
- و بين معايش و بين الشيش .. و بين الریش و ما تشوفنیش .. باقيلي من
المفیش باقي .. و باقي من البواقي مفيش ...

مُرَادِفَات أُخْرَى لِلْمَوْتِ

- أَمَالِكْ كَثِيرٌ .. وَ جَلْمَكْ كَبِيرٌ .. وَ بَيْنَكْ وَ بَيْنُهُ .. سَطُوْحٌ فَوْقَ سَطُوْحٍ .. تَعَاْفِرُ فِى تَطَلُعٍ .. وَ تَقْشَلُ فِى تَرْجَعٍ .. تَقْضَى إِلَيَّ بَاقِي .. تَدَاوِي فِى جُرُوحٍ .. هَزِيمَةٌ طُمُوْحٌ -
- بَرِغْمُ الْأُخُوَّةِ .. وَ رِغْمُ الْإِنِّ هُوَ .. شَقِيْقَكْ وَ صَاحِبَكْ .. بَحَقْ وَ حَقِيْقٌ .. لَكِنْ بَرِضُهُ عَابِكْ .. فِى ضَهْرِكْ وَ سَابِكْ .. تَحْبُطُ لَوْحَدِكْ .. فِى وَسْطِ الطَّرِيْقِ .. خِيَانَةُ صَدِيْقٍ -
- وَ رُوْحِكْ فِى رُوْحِهَا .. وَ إِسْمَكْ فِى بُوْحِهَا .. وَ عُمْرُكَ مَا عِنْدَهَا .. بِتَقْدَرِ تَغِيْبٍ .. لَكِنْ فِى النِّهَايَةِ .. نَهَيْتُوَا الْحِكَايَةَ .. وَ مَشَّ مَكْتُوبَالِكُمْ .. فِى مَلَكُوْشِ نَصِيْبٍ .. فُرَاقُ الْحَبِيْبِ -
- حَاجَاتٌ بِنِقَابِلِهَا .. وَ نِفْضَلُ تَشْيِلِهَا .. وَ مَهْمَا بِنَكْبِرِ .. لَا يُمَكِّنُ تَفْوْتَ .. كَلَامِي إِلَيَّ فَاْتِ .. بِبِقْدَرِ سَاعَاتِ .. يَجِيْبُكَ مَعَانِي .. لِكَلِمَةِ "تَمُوْتُ" - مُرَادِفَتَمُوْتُ -

▪ ذقت النهاردة الجوع .. لكئته مش للزاد ..

مش كل كلمة وطن .. لازم تكون لبلاد ..

(التفاصيل ص ٥٢)

▪ و الدنيا رهان .. و أنا داخل فيها بآخر فيش ...

و معايا حصان ..

(التفاصيل ص ٥٤)

▪ ماشي و سايبها لكم .. يا عثمانين في الغير

من قلبي بدعيكم .. يبقى اللقا على خير ..

(التفاصيل ص ٥٥)

▪ زاد العمر سنين و ما زادش

و أنا دلوقتي في الستين ..

(التفاصيل ص ٥٩)

مفاهيم جديدة

يوم بعد يوم بعرف
مفهوم جديد فينا ..
و أغرق في بئر أسرار
و ما يحكيهاش لينا ..
دقت النهاردة الجوع
لكنه مش للزاد ..
مش كل كلمة وطن
لازم تكون لبلاد ..
مش كل نظرة شوق
معناها جنينه ..
و إن نلعبور بالعطش
مش بس للميه ..
و ساعات بشوف الكون
من زاويه منسيه ..
و انا كنت شايفه زمان
ثابت ما يتغيرش ..
و العمر مهما يطول

برضه إحنا ما بنكبرش .
و العقل لو يندّه
نسمع و نعمل طرش ..

تقع الحياه فينا
و إحنا ما نتأثرش
فَنسيبها مرميه ...
ولأنه كُون دوار
و الأرض كرويه ..
فالقاعده و البرهان
مش ميه في الميه ..

آخر فيش

الدنيا سباق
و العُمر خيول ..
و سمعت كثير من ناس بتقول ..
أد ما بيطول وقت اللفه
أد ما هتعيش ..
و الدنيا رهان
و أنا داخل فيها بآخر فيش ..
و معايا حُصان ..
و الباقي معايا من الماضي
مش جايب حق الدُخان ..
فأكيد لو هخسر مش هخسر
أكثر مانا أصلاً خسران ..
و أتاري مع سباق الدنيا
محدث كسبان ..
إللي بيوصل بيكون باقي
منعمره مفيش ..
و إللي بيتأخر في اللفه
هو إللي يعيش ...
لكن بيكمل في الدنيا
من غير ولا فيش ..

للأبد

يا عثمانين في "الأبد"
ماشي و سايبهاكم ..
لكني قبل ماروح
في حاجات هقولهاكم ..
أنا برضه كنت في يوم
عثمان كمان زيكم
حلمي شبه حلمكم
و الحال شبه حالكم ..
الحلم مش موجود
غير بس في خيالكم ..
هنعيشوا تتمنوا
و تموتوا تستنوا
ولا حاجة جبالكم ..
ماشي و سايبهاكم
يا عثمانين في الغير ..
من قلبي بدعيكم
يبقى اللقا على خير ..
دا العمر فات و إنتهى
قبل الحياه بكتير ..
و مفيش وجود لـ "الأبد"
غير بس في الأساطير ..

آخر باب

ساب المنشار

دق المسمار

بص على زبونه

متردد

ينطق أو يسكت

محتار..

-أؤمر

-شكراً

-ترابيزه / دولاب ؟

-لا أبداً .. أنا عايز باب ..

جربت كثير أبواب لكن

ولا واحد كان نافع بيننا ..

و إنجه مضبوط لازم برضه

في الآخر يطلع فيه سيئه ..

لو كنا واربنا الباب يمكن

كان يفضل م الهوا سرسوب ..

كان ممكن أتوب ..

كان ممكن بيبقى المكتوب
إن إحنا نحافظ على بابنا..

كان ممكن نتعب
و نكمل
و هنوصل
على أد تعبنا..
سرسوب الهوا قفله و سابنا
إثنين و مابينهم
باب مقفول..
أنا يعني بقول
لو ينفع أجرّب باب تاني
يفتح على كل اللي ما بيننا
لو حتى هيطلع فيه سيئه
وانا هقفل و افتح بحساب..
-كان نفسي أساعدك
صدقني..
أنا آسف
كان آخر باب...

فرق توقيت

الحاجة بتجيلنا
بعد أما نزهدها ..
و تروح أوام فجأه
أول ما نعتادها ..
تلقى القدر خدها
و سايلنا المعدوم ..
الفرق في التوقيت
فيه سر مش مفهوم ..
و الخط ع السكة
فيه جزء مش مرسوم ..
و الكون ميزان معلوم
لكن بقول جايز
جينا إحنا من بدري
و العمر تاه يجري
جه بعدنا بكام يوم

لسّه ما جتّش

كُنت أنا لسا صغير يومها
عَيَلْ عُمُرُه سِت سنين ..
كان البيت مليون بالناس
و أنا مش فاهم ليه قاعدين ..
ليه كان أبويا ببيكي بحرقة
كل ما بسأل راحت فين ؟ ..
طب ليه كل الناس جايين ؟
ليه قافلين التليفزيون
و القرآن شَعَال في الصاله
و أنا عايز أشوف الكارتون ..
ليه كل ما بسألکم عنها
كله يقوللي لسّه ما جتّش
مانا عَدَبْت على إيدي يومين
معقول لسّه الوقت مَفَاتَش ؟ ..
زاد العُمَر سنين و ما زادش
و أنا دلوقتي في الستين ..
لكن بسأل نفسي تملي
نفس سؤال السِت سنين
سلّه ما جتّش ؟
راحت فين ؟ ...

كُل الحكايات

- كل الحكايات .. محكية ف ورق الجوابات ..جوابات راحت ..
جوابات باحت .. بين ناس كان بينهم مسافات ..قيسوا المقاسات ..
راجعوا الكلمات ..جوابات هتكمل جوابات ..

بسط و مقام

- درس الحساب دايماً .. كان يفتَح المقفول ..و مكانش فيه قسمه .. إلا و
ليها حلول ..درس الحساب بيقول .. كُـل الحساب الواحد .. و عرفت
لما كبرت .. إن الحساب جاحد ..و البسط هم كبير .. و أنا في المقام
واحد ..

الأحد لا يأتي أبداً

- قدمت السبت ...و آديني إتسابت لوحدي مايبين .. الخوف و الكبت ..و
ياريتني حسبت ..و ياريتني عرفت إن الباقي .. يادوبك ع القُد ..و إن
الأسابيع الباقيالي .. مافيهاش ولا حد ..

وعد الحر

- و فاكر لما جيت ماشي .. وَعَدْتُ حاجاتي برجوعي ..و قتلتها يادوب
كام يوم .. و كاتم قلقي في ضلوعي ..و كان أول جواب رايح .. معبي
سطوره بدموعي ...و كلمه وحيدة - سامحيني .. ياريت كان القدر
طوعي ...

سيلفي

تَصَوَّر
لَمَّا بَتَصَوَّر
بشوف نفسي كئيب شاحب ..
و صوَرِي كلها سيلفي
جُكَم إني ماليش صاحب
يصوِّرني ...
زرار الكاميرا عوِّرني ..
و سابلي علامه ف صباعي ..
و سابلي في الصور هَزَّه
بتفضح كل أوجاعي ..
دراعي وجعني م التصوير
و رغم إن إللي فتيا كبير
صَوَّر
لساصبَوَّر ..

طلب أجازة

سيادة مدير الشؤون بالإدارة
جناب المبجل / علاء فوزي سعد ..
تحية و بعد ، ...
بناء على ما تقول اللوايح
و نظراً لأن إللي جاي كله رايح
و حيث و قطعاً لهذا السبب
رجاء التكرم بختم الموافقة
و أرجو بشدة قبول الطلب ..
بشأن إني عايز
أخذ يوم أجازة
عشان عندي حبة
بلاوي و ظروف ..
و لو مش مصدق
فممكن تحقق
و تقدر جنابك
بنفسك تشوف ..
أريد الأجازة عشان لـ إنعزال

و اعيط براحتي لحظي إللي مال
و أخيط جروحي
و أَلصمَّ في روعي

و أروح و أستخبّي
في أوضة العيال ..
أجاز صَيفِرَة يادوب هو يوم
أرَيح في جلدي إللي داب في الهدوم
و أطبب عليا
و آخذ حُصني فيا
و أنام مسترَيح
و بعدين هقوم ..
فأطلب بُناءً على ما تقدّم
و حالي إللي مُرفق بطلبي المُقدّم
و كل الحكاوي
و ذلك و هذا ..
فأرجو بشدة موافقة سيادتك
بشأن البلاوي
و شأن الأجازة ..

مذكرات أم حمادة

(١)

من يومين ..
رُحْتُ للدكتور و قاللي
بعد ما شاف السونار ...
ربنا عَوْض علينا
بعد طول الإنتظار ...

(٢)

النهاردة يبقى فاضل
بيجي أسبوع ع الولاده ...
قُلنا هنسميه محمد
و الدلع هيكون حماده ...

(٣)

إشترينا سرير صغير
كان معاه ألعاب كتير ..
رغم إنني عارفه إنني
مش هسيبُه في السرير ..
و إهتمامي بكُل حاجته
خلًا أبوه بادئ يغير ..

(٤)

رغم وجع الحمل فيًا
و الولاده القيصريه

كُنْتُ طَائِرَهُ مِ السَّعَادَةِ ..
كُنْتُ أَوَّلَ مَرَّةٍ أَمْسِكُ
بَيْنَ إِيْدِيَا إِيْدِيَيْنِ حَمَادَةٍ ..

(٥)

النَّهَارَةَ مَاتَ أَبَاہ
سَابِنِي وَحْدِي لِلي بَاقِي ..
سَابِ حَمَادَةٍ وَ هُوَ عَيْلٌ
لَسَهُ دَاخِلٌ لِي إِبْتِدَائِي ..

(٦)

بَعْدَ مُرِّ سَنَيْنِ شَقَايَا
جِهَ كَرَمِ رَبِّكَ زِيَادَةً ..
لَمَا جَالِي وَ جَابَ فِي إِيْدِهِ
ظَرْفٌ أَبْيَضٌ فِيهِ شَهَادَةٌ ..
مِ السَّعَادِي أَنَا هَبَقِي رَسْمِي
مَامِتِ الدُّكْتُورِ حَمَادَةٍ ..

(٧)

لَسَهُ رَاجِعَةٌ مِ الْمَطَارِ
بَيْنَ حَيْطَانِ الْبَيْتِ أَعَافِرُ ..
سَابِنِي لَجَلٍ يَشُوفُ طَرِيقَهُ
خَدَّ سَنِينِي مَعَاهُ وَ سَافِرُ ..

(٨)

.....

(٩)

.....

(١٥)

مَرُّ الوقت

شهر أهو فات

لكن لسه مفيش جوابات ..

(١٦)

.....

(٢٠)

.....

(٢٥)

عدى شهر

عرض و طول

جايز برضه يكون مشغول !

(٢٦)

.....

(٤٠)

.....

(٥٠)

إبني حمادة ..

بكتب م المستشفى سلامي

مستنتيه دُعاك بالرحمه

أول لَمَّا هتقرا كلامي ..

تيجي تزور نيف مدفن أبوك

و يارب ما يقطعك عاده ..

لو مش عارفه

هيدلوك ..

إسأل على قبر أم حمادة ..

للمزيد من الأخبار حول حمادة .. راجع ص ١٢

وجهة بَصَر

قاعد بيحكّيه
يوصفه في الدنيا..
و يفهمه الفروقات
بين حاجه و الثانيه..
في الشكل و البنيه
و الدرجه و الألوان..
و الملمس الظاهر
و الخافي في الأبدان..
"

كل الحاجات بتبان
شئ ثاني غير هيا..
معنى المَدَى / فِدَان
معنى البُكا / مَيّه..
الأرض / يعني براح
و القَطْر / كل ما راح
نُفاح / جناح / مُفْتاح
مصباح و جنيّه..

المُشكلة مش فيك

المُشكلة فيًا ..

الشكل - غير معروف..

اللون - وحيد مخطوف..

حاسس بشئ م الخوف

من نظرتك ليًا..

من ضلّمة النسيان..

.."

واحد سليم بيشوف

راح يسأل المكفوف

عن عالم العميان...

كلام معقول

يوم السبت إللي بعد الجاي
هكون مشغول..
ياريت قبل أما تيجي تقول
عشان الحد و الإنتين..
بروح مشوار
و أغيلي يومين..
وبعدين..
في التلات أرجع
أنام ساعتين
و أقوم لـ أربع..
أطلع م الفريزر كيس
عشان يوم الخميس
أطبُخ
و أسهر و أصحى ع الجُمعه..
و يوم السبت من سبعة..
و كالعادة
بكون مشغول..
ياريت قبل أما تيجي تقول..

في ساعته و تاريخه


قد تبين بالمعانيه
-و إكتب الحاجة إلي باينه-
جوه تفاصيل المكان..
جته هامده
عُرفه قبلي
شُرفه طله ع الميدان..
خَدا بصمات البيبان
و الإزاز و الكويات..
خدا صورة لكل حاجه
قد تُفيد في التحقيقات..
الفقيد ساعة ما مات
كان معاه ف إيديه حاجات..

..
ساعه واقفه
يبدو ساعته..
عاش في دنيا مش بتاعته
مات ما بين يأسه و قناعته..

و فدقاعئهُ اليبأس أكرتر
كان في إيدُهُ التانيه دقتر
بالتاريخ سَجَل حيائهُ..
إللي شافهُم
و الللي خافهُم
و الللي عاشهُم
و إللي ماتوا..
و حكاياتهُم و حكايائهُ..
مات كتر من يوم ما فاتوا..
..

ويوم وفائهُ
مات و كان في إيديه حاجائهُ
حرز كان
ساعئهُ و تاريخهُ..
تم حفظهُ بشكل رسمي ..
-سَجَلهُ ف ساعئهُ و تاريخهُ-
و إقفل المحضر
بإسمي...

صورة إنت مش فيها



و كام من صورة بنشوفها .. و نتمنى نكون
فيها .. و لو ينفع نعود لحظة .. و نحضر
وقت حكاويها .. و قعدتها و لمّتها .. و
سُفرتها .. و كراسيها .. و ناس إترصّوا
حواليها .. و ليها عندهم باقي .. و لو في
العمر كان باقي .. حاجات ليا .. أكيد هيا .. و
لو ليها فانا ليها .. تموت فينا الحاجات

أوقات .. تعيش وإحنا نموت بيها .. و ليه بتقلّب الأيام .. و إيه كان فكَرَك
بيها .. تروح تيجي يادوب صوره .. و أهو إنت حتى مش فيها ..

شاهد المزيد من الصور :

- صورتِي و أنا صُغِير و بلعب عند بيت ستي - ص ٧٦
- صورة لباب الزنّانة - ص ٧٨
- أصول كل الصور - ص ٧٩
- صورتين زمن - ص ٨٠

سَيِّئِي

و بالصُدْفَه
بَقَلْبِ جُوهِ كَرْتُونْتِي
لَقَيْتِ صُورَتِي ..
و أَنَا صَغِيرٌ
و بَلَعْبِ عِنْدَ بَيْتِ سَيِّئِي ..
و سَيِّئِي - لَلِي يَعْرِفْنِي
حَيَاتِي و عُمُرِي و طُفُولَتِي ..
و كَانَتْ لَوْ تَشُوفُ ضَيْقَتِي
تَنَادِينِي أَرْوَحَ و أَجْرِي ..
تَقُولُ لِي تَعَالَى عَلَى حَجْرِي ..
و إِيْدَهَا تَمُرُ بَيْنَ شَعْرِي
لِحَدِّ مَا أَنَامُ ..
و سَيِّئِي حَجَرَهَا عَالِمٌ
و كَانَ أَوْسَعُ مِنَ الْأَحْلَامِ ..
و كُنْتُ أَنَامُ و مَعْرِفَتِي
يَجُوزُ سَاعَهُ
يَجُوزُ كَامَ يَوْمٍ ..
و أَقُومُ عَلَى طَبْطَبَةِ إِيْدَهَا
عَلَى صِدْرِي تَصْحِينِي
تَدَلِّعُنِي - تَنَادِينِي
بِأَحْلَى إِسْمِ حَبِيبَتِي
و يَا مَا سَمِعْتُهُ مِنْهَا زَمَانَ ..
و كُنَّا نَزُورُ عَلَى الدُّكَّانِ ..

و أجيب شيبسيو أجيب بسكوت
و أجيب نُوجَهو باكو لبان ..
زِرْوَح و المزاج رايق ..
و انا من فرحتي فايق ..
لكن كانت بِتَضَائِق
ساعة ما هدمي تتوسخ
ف ع الحمّام توذيني ..
تَحْمَيني ..
و أشكيلها و تتأسف
عشان دَخَل الصابون عيني ..
و أَنشَف بعدها بفوظتي ..
تَشيلني لحد باب أوضتي
تَلْبَسني ..
تِشرتي و جزمتي و سُورتي ..
و الأقبيني بقيت نُسخة
من إللي أنا شايقه دلوقتي
بتفاصيله هنا ف صُورتي ..
و أنا لسّه يادوب عيّل
و بلعب عند بيت سيّي ..

الزنزانه

الصورة لباب الزنزانه
باللون الأسود كالعاده ..

لكن متصوّر من نُقطة
على عكس اللقطة المُعتاده ..
تصوير ساده
من غير ولا لون ..
الإيد الماسكة الفُضبان
إيد السجّان الملعون ..
علشان الصورة دي متاخده
من كاميرة واحد مسجون ..

للصورة أصول

يا أهل الذكرى المنسيه
للصورة أصول ..
مش بقصد يعني كلام إيتيكيت
و لا ع البرانيط
و لا حاجه من دول ..
أنا أقصد أقول
للصورة أصول ..
يعني الأرواح كانت فيهم
لحظة ما الصورة بتتاخذ ..
و تبص لأشكالهم فيها
تلقى المبسوط و المتأخذ ..
و الكل يبص على الكاميرا
و يعدوا ثلاثة
إثنين
واحد ..
مباقيش م الصورة ولا واحد
غير واحد داير بيقول ..
يا أهل الذكرى المنسية
للصورة أصول ..

صورتين زمن

طابع دماغه
و فاتورة نور
و طلب متوقع م الضامن ..
تكتب بوضوح اسم المذكور
و تسدد في الدور التامن ..
و تقدم
و محدش ضامن
الخير جاي فين ..
و تجيب طبعاً وياك صورتين ..
الصورة الأولى تكون عيل
لقطوها زمان و انت صغير ..
ف ستوديو قديم
بحيطان خضره
و ستاره مكاننش بتتغير ..
و بشعر قصير
مفروق ..
و قميصك - كاروهات من فوق ..
و جيوبه الساده
كانت ساده ..

مفاضلش من الصُورة إلاده ..

بعد مشعرك

بقي فرقته كبير ..

بعد ما خطاويك لقت ياما

بتحارب عكس المشاوير ..

بعد التأخير

و التبرير ..

و العُمر إللي معدّي ف ثانيه ..

كان لازم يحصل تغيير

يتصورّ

ف الصورة الثانيه ..

صورتين هتاخذهم م الدنيا

ترفقهم ببيان الحاله ..

أنا عاذرك

بس عشان خاطرک

الخرنه هتفضل شغاله ..

....

روح كمّل ورقك

و تعالى ..

اليوم يقال

اليوم - يُقال

إن المقال

لو مهما طال بيه الورق ..

هيجبله وقت و يتحرق ..

مغشّعة الفرن القديم

أو يتفرش فوق الكليم ..

تحت السمك

تحت المرق ..

قراطيس و مركبلعيال ..

اليوم يقال

إن المقالو كان صدق ..

كان الكلام سبقه و بدأ ..

لحق الأماكن ع الصفوف

كان يبقى مستنيك تشوف

بين الحروفمالم يُقال

عذراً .. مفيش اليوم مقال ..

مذكرات لم تُكتب

الأجندة .. إللي فيها مُذكراتي .. و إللي شايله بين سطورها .. كل يوم عشئه ف حياتي .. المقتر و إللي حاصل .. و إللي سافر و إللي واصل .. و إللي جابني و إللي خدني .. و إللي سَجَلْته و كتبْته .. و إللي سَجَلْني و كتبْني .. و إللي سبْته ع المفارق .. و إللي كان فارق و سابني .. أبني بيني و بيئْه فاصل .. و إللي حبيئْه و خدعني .. و إللي بعْته و إللي باعني .. و إللي جاي علشان يفاصل .. و الفواصل في الحكاوي .. أهه طالعه بتتهيدات .. كل تنهيده ب حكايه .. كل حواديتي نهايات .. النهارده .. شفت بالصدفه الأجندَه .. فوق رفوف الذكريات .. و إللي باقي فيها مَيِّي .. إسم كان مكتوب عليها .. و تحت مئْه "مُذكرات" .. و إفتكرت ساعتها إني .. عُمري يوم ما كتبت فيها .. أي حاجه م إللي فات

في مثل هذ اليوم أيضاً :

- عيد التجاعيد ص ٨٤
- راح عشان يطلب إيديها ص ٨٥
- أنا جيتلك لكن يا خسارة ص ٨٨
- وصلت على رصيفها أستى ص ٩٠
- سُبْحان من جَمَعنا فقهوة .. ص ٩٢
- و مشينا و السكة .. صاحبت خطاونا ص ٩٦
- أنا عايز أكبر .. مش عايز .. ص ٩٧

عيد التجاعيد

واقف شارد
بيقلب وثئه على مرأيه ..
ويتابع شكل التجاعيد
يخلص و يعيد
و يزيد في شروذه مع حكايه ..
يقفل نهايتها مع نهايه
و يغمض عينه مع الذكرى ..
عاشت فكره
ماتت علشانها متين فكره ..
و أهو كله مسيره يموت بكره
و العايش عايش
بس وحيد ..
بيقلب وثئه على مرأيه
و يتابع شكل التجاعيد ...

لسه فاكر فيها إيه

سَدَّ بَابُهُ ..
مَدَّ إِيذُهُ فَوْقَ دَوْلَابِهِ ..
نَزَلَ الشَّنْطَةُ الْقَدِيمَةَ
شَالَ ثُرَابَهَا وَ شَالَ ثُرَابَهُ
لَسَا سَوَسَّتْهَا سَلِيمَهُ ..
لَسَا فِي جِيُوبِهَا التَّذَاكِرَ
مَشَ هَيْنَسِي وَ لَسَا فَاكِرَ
يَوْمَ مَا جَابَهَا جَابَهَا لِيهِ
لَسَهُ فَاكِرَ يَوْمَ مَا سَافِرَ ..
لَمَا سَابَهَا سَابَهَا لِيهِ
لَسَهُ فَاكِرَ فِيهَا إِيهِ ..
الدُّوسِيهِ ..
وَ الْهَدْمَتِينَ ..
بَنَطْلُونَ كَانُ لَوْنُهُ إِسْوَدَ
وَ الْقَمِيصُ أَبْيَضُ حَزِينِ
الزَّرَائِرِ نَاقِصَهُ فِيهِمْ ..
وَ النَّدَمُ عَلَيَّ كُلِّ لِحْظَةٍ

كان ماليهم ..
و الجيوب لسا بحالتهم
مخرومين ..
هدمتين ..
كان لابسهم يومها لما
راح عشان يُطلب إيديها ..
كان ساعتها حلم عُمره
إن عُمره يحلا بيها ..
كان شاريها ..
رغم إنه مكانش حيلته ..
رغم إن مفيش أسامي
أي حد كبير في عيلته ..
أو قريب واحد مهم
المهم
إنت فعلاً واد مكافح
و الحكايه و الروايه ...
و بُكره تبقى حاجة تانيه
و أصل فصل و في النهايه ...
كل شئ قسمه و نصيب
كل إيه ؟
يعنى يوم ما الدنيا تضحك

تيجي قال تضحك عليه ..
راح يومها البيت و تايه
كُل ده بيحصله ليه ..
مَد إيئه ع الدوسيه ..
إللي جَمَع فيه سنيئه
ورقه ورقه ...
الشهاده والإفاده
و الراقات إللي دفعها
بالفوايد و الزيادة
كلها معادتش فارقه ...
في النهايه فارقت مين ؟
في النهايه الباقي ايه ...
غير يادوب الهدمتين
محطوطين جنب الدوسيه ..

زيارة من الماضي

أنا جاي متعشم ألاقيك
و مرهن على إني هشوفك ..
و أديني لقينك في مكانك
قاعد بين ورقك و حروفك ..
نفس حياتك
نفس ظروفك
لسه على عنيك باين خوفك
من كل غريب جاي بيسلم ..
لساك مُتردد كالعاده
و القهوة بتشربها زيادة
و بتنهج لما بتتكلم ..
لساك بتآمن و تسلم
بحكاوي زمان
و النداهه
و كلام العرافه إياها
و الفرصه اللي حكيتك عنها
و فضيلت كثير تستنأها ..

لسآك متغرّب في متاهه
تهرب من شبكّه لسناره ..

و ملامحك هياها ملامحي
من غير الشيب و النضاره ..
أنا جيتلك لكن يا خساره
أحلامي و أحلامك ماتوا

...

أنا إنت و جايالك طيمن
لكن من ثلاثين سنة فاتوا ..

مترو

شفتها واقفة بتستنى
ع الخط الرايح في المترو ..
و الزحمة حاجز بيننا
و الناس كيتروا ..
طب أشوفها إزاي ؟
و أنا أصلاً واقف مستني
ع الخط الجاي !
كان نفسي السكة تكون واحدة
و يجمعنا رصيف ..
و أحكيلها على الواد العاشق
أبو قلب نضيف ..
الحظ معاند ويايا
و ف قلبي ٢٠٠ ألف حكاية
أحكيها إزاي ؟
لو هي علي الخط الرايح
و انا واقف ع الخط الجاي ؟
قررت ف مرة إني أغير
من خط السير ..

و نزلت الصُّبحِ عشان ألحق
قبل المشاوير ..

و وصلت على رصيفها أستنى
و كلامي بيدعي و يتمنى
طب أقوله إزاي ؟ ...
و أنا لمّا وقفت على الراح
كانت هي ع الخط الجاي ؟ ...

معروف طول عُمرِي إن أنا خايب
و اهي دُنْيا و واخذانا مقاوله ..
تلعب طاوله ؟
أنا بلعب بالإسود دائماً
علشان كان صادق م الأول ..
الأبيض كان بيعشمني
و في آخر اللعب بيتحوّل ..
و اللعب يمسّخ و يطول
و الزهر مفيش ..
ولا راضي يجيب
غير يَك الشيش ..
و ف آخر اللعب الـ يَك يموت
و الزهر يعيش
مع إن الـ يَك كان الأولى ..
أنا أصلاً زهقان م الطاوله
ومن صوت فرقعة القواشيط ..
أنا بقعد ع القهوة يوماتي
أكثر مانا بقعد في البيت ..
إنّـت إتغدّيت ؟
طب أجيبلك ويايا فطيره ؟
يا سنوسي

شيل التعميره ..
فوريره يا واد
إثنين رومي
و واحده مشكل ..
من فتره زمان و أنا بَتَكَل ..
أنا كُنت بشوف إن أنا ناقص ..
مش ناقص يعني إن أنا ناقص ..
لأ أقصد يعني ف تكويني ..
و أنا أصلاً مش ناقص حاجة
أنا كل ما فيا مكفيني ..
مش عايز حد يعزيني ..
شُفت الزيني ؟
بيقولوا سافر
أنا فاكِر مرّه وانا مسافر
بالقطر بعيد ..
ولا كان بيوَقَف في محطة
ولا له مواعيد ..
مش فاكِر شئ بالتحديد
غير إنه رمانى و سابنى هنا ..
- فيه حد هنا ؟
أه خلى الكُرسى معانا تاليت

بيجيب حاجه
و ثواني و جَيَّ ..
و إن غاب و إتأخر راح ييجي
و مسير الحيّ ..
هيف و ييجي على الكرسي ..
تشرّب بييسي ؟
على رأيك
وقفلنا تاكسي ..

...

...

مين الإثنين دول يا سنوسي
دول راجل و ابنه يا معلم ..
الراجل - يعافينا- زهايمر
و أهو ابنه يا عيني بيتألم ..
بيجيبه يوماتي على القهوه
يسمعه و هو بيتكلم

الكنز في الرحلة

زي النهاردة زمان
بدأ الطريق بينا ..
و مشينا و السكة
صاحبت خطاويننا ..
فوق نفس شوك بُكره
دُوسنا و عَدِينا ..
و فِرحننا و بكينا ..
نفس الطريق يا صديق
شاهد على المشوار ..
و الضحكة و الدمعه
و العُربه و الأسرار ..
صاحب و أخ و جار
و الدُنيا بيك تحلا ..
صدق اللي قال يا صديق
الكنز في الرحلة..

الرقص على سلالم العُمر

الفرح نصيب
و الجرح نصيب
و الضربه إلهي ما بتصيب - تدوش
اليوم كراكيب
و الهوا سراسيب
أد ما هتسيب - أد ما تكيش ..
أنا عايز أكبر و أحوش
و أشتري ساعه ..
و أعمل دكتور و إحنا بنلعب
و أتصوّر - بالطو و سمّاعه ..
و أشتري سمّاعه بتستحمل
أحلام بلالين ...
و أشرب نيكوتين ...
و أشتري ولّاعه بينزين ..
و أنفخ محروق الدخان
و أطارده بإيدي - و ألوش ...
أنا عايز أكبر و أكوّش

ع الدنيا بأبعادها و طولها ...
بأراضي و مال ...
و أشترى بدهبها عُقد و حبال
و أتشعلق في عيونها و أطولها ..
أنا عايز أصبر و أنولها
و وصولها مُحال ...
و الصبر مُحال ...
و العجز لا يُمكن يتقال ...
و المر بيفضل مكتوم
و هيفضل مرّ ما يخلوِّش ..
أنا عايز أكبر و أبوِّش
كلّ المركون فيّا و صدّي ..
و بقاله كتير ..
أنا كلّ حياتي كانت تأخير
و القطر زمان فاتني و عدّي ..
أنا عايز أجيب خاتم فضّه
بفصوص عيره ...
و أشرب بيره ...
و أكون في لسان الناس سيره ..
و قصص و خيال
و أهو كُله كلام و ما بيضُرِّش ...

أنا عايز أكبر و ماكرش
زي ما بيكر بلوقر صوف ...
بين عُرزة و خيط
زي ما بتكر حيطان البيت
و تسيني ما بين الناس مكشوف ..
أنا عايز أكبر و أشوف
موج تجاعيدي ...
شكل حفيدي ..
و أحس الرعشة إللي ف أيدي ..
و هشاش العُمر
و أصحاب أموات و عجايز
و ما بين مُتأكد - أو جايز
أنا عايز أكبر
مش عايز ...

و منبّه رن

الجو كئيب
و الحر شديد ..
و أنا واقف في الزحمة أستنى
أتوبيس الهيئة إليّ ملثمه
بيجي ف مواعيد ..
من كتر الحر ما بيزيد
قربت أدوب ...
و بزاحم على واحد جنبي
بيهوّي بجورنان على وشه
و بلحق سرسوب ..
بتنّفس و بغمض عيني
بلاقيني إرتحت
فتّحت لقيت صورتي ف وشي
جوه الجورنان !
و بسرعه قرّبت المكتوب ..
" و الحادث كان عبارة عن"
- و منبّه رن -
فصحيت م الحلم و مفزوع
عرقان بتنّفس بصعوبه
و ميّت م الجوع ..
بصيت حواليا أشوف أنا فين
و دي تبقى أساساً أوضيّة مين

طَبَّ إِيهِ الْمَوْضُوعُ ! ..
و لِبَسْتِ الشَّبِثِيبِ و أَنَا تَائِيهِ
و خَبَطْتُ فِ بَابِ ..
أَتَارِيهِ كَانِ بَابِ الْبَلْكَونِهِ
و أَنَا فَكَّرُهُ دَوْلَابِ ..
بَصِيَّتِ عِ الشَّرَاعِ مِنْ فَوْقِ
و الدُّنْيَا نَهَارِ
و كَانِ النَّاسِ وَسَطِ الزَّحْمَةِ
رَائِحِينَ عَلَى نَفْسِ الْمَشْوَارِ ..
و النَّاسِ مَشِ طَائِقِهِ
و مَضَائِقَهُ ..
و لِمَحْتَنِي وَاقِفِ فِي الشَّرَاعِ
بَسْتَنِي فِ أَتُوبِيْسِ الْهَيْئَةِ ..
و الْحَرِ يَزِيدِ
و النَّاسِ بَتِّيْنِ ..
و الرَّاجِلِ صَاحِبِ الْجُورِنَانِ
عَمَّالِ بِيهَوِّيِّ و بِيَزْنَ ..
- و مِنْبِهِ رَنْ -

رؤيا

في حضرة صاحب الرؤيا
و في وجود الشيوخ و الزار ..
على صوت الدفوف و الدق
و بين ريحة البخور و النار ..
و بين الضلمة في بصيرتك
و خوفك و إنت متغمي
تعالى و إستعيز بالله
و إحكي بعد ما تسمي ..
فد بسم الله يزول همكع همي ..
و قول رؤياك
سلمي الله على جملي ..
و رؤيايا عن التانيين
و عن مساكين
و عن أمي ..
و عن مجانين
و ناس جاين
لأبويا و جدتي
و عمي ..
و عن مساجين
و ناس بتبيع
في ناس تانيين ..

في سوق زحمة
و كوم لحمة
رخصه
رُخص بني آدمين ..
و عن تايهين
في ليل سارح
و عن بُكرة
و عن إمبارح
و عن تعابين ..
بتطرح ع الخلايق سيم
و بركة دم
مليانه بجنث أشلاء
لناس أحياء
و مش عايشين ..
و ناس واقفه
و ناس قاعدة
و ناس ماشيين ..
و عن ياما حاجات تانيه
مفيش بينهم ولا رابط
فأفتوني يا أهل الزار
لو الرؤيا كانت صابت ..

ولا أي حاجة

كان فاكر إيه
كان فاكر ..
وطلع مش فاكر ولا حاجة..
كان خايب لكن
كان طيب
كان نفسُه يحافظ
ع الحاجه..
كان شئ
وصديق
وطريق ماشي
والآخر
ماوصلش لحاجه..
كان حاجه و محتاجه لحاجه..
كان شايب / خايب
كان طيب
و طلع مش طيب
ولا حاجه..

حدث في مثل هذا اليوم

الحُب الأول - و شارعها..
و دروس الثانوي و مراجعها..
و السهرة تقلب مواجعها..
و أتفاجئ بالدمعه ف عيني.....
فينك دلوقتي
و أنا فيني.....

بين طابور الخسرانين

جائز بتحدف سكتيداً شِمال .. لكن بمحاول كل
مرهاً كون يمين .. جائز ما بدعيش ربنا .. خوف أو
رجاء .. لكني لما أسمع دُعاء .. بطُلب في سرِّي ..
وأقول آمين .. و كثير بكون مليان غلظ .. و ذنوبي
فوق كتفي تُقال .. زي الزلظ .. كُتر العَبَط .. خلاني
واقف بين طابور الخسرانين ..

بستسمحك .. يارب كل الغلبانين .. و الندمانين
والطمعانين .. تقبلني بين كل
الخيارى العثمانين .. وإقبل معايا .. إللي سمعوني فـ
دُعايا .. كلُّهم .. إكمن برضه السكة حدّفت منهم ..
و سمعت صوت من سرهم .. بيقول آمين ..

ساعة القضا

ساعة القضا ..
يارب ليه صعب الرضا ..
ليه الزحام وسط السيك
أصبح فضا ..
و أنا ليه كده ؟
كاتم في قلبي و مُنطوي
زعلان أوي ..
مش معترض
أنا بس جايز بفتراض ..
إن البصر أد المدى
و نللمع على أذ الصدى
و إن الرضا ..
ممكن يكون أذ الوجع
ساعة القضا ..

تيجي فيك

الرسائل - كل مره -
تيجي دايماً مش صريحه ..
يعني تدّيك إشارة
فيها حاجه مش مُريحه ..
يعني لَمَّا تبقى قاعد
تيجي طوبه في اللي جنبك ...
و أما خط العُمر يخلص
فجأة من حد ف حبايبك ...
يبقى مضمون الرساله
إنه مستتبيك و سايبك
تفهم اللي في الرسائل ...
لسه عندك وقت تلحق
تبكي على كل العمائل ...
خف نفسك م المشايل
و الغشاوة اللي ف عنيك ...
خلي بالك إن مُمكن
بُكره يبقى الدور عليك ...
و إن طوبه فجأة تطلع
مكتوبالك
تيجي فيك ...

ناتج إنسان

بمراجعة كل الكشوفات
و سِجَلِ الوارد و الصادر ..
و بجمع جميع البيانات
أوراق و ملازم و دفاتر ..
و مصادر دخل الحسنات
و حساب الجذر التربيعي
للجلد علي جدار الذات ..
و بجمع ما فات ..
ع الذنب السابق
و ما قبله ..
على خير و خطاوي
و ما إتقابلوا ..
على كشكول فاضي و متسائله
واجب لمعاصي و عصيان ..
يطلعك ناتج إنسان ..
لوربه ما سامحوش الليله
هيات متندّم خسران ...

تدابير

دايماً بتيجي الريح
عكس إتجاه السير ..
و ساعات بسيب حاجة
و يكونلي فيها الخير ..
و الجلم لو حلمي
بيحققوه الغير ..
مش لوم على المقادير
أبدأ لا سمح الله ..
و لأعمري قلت فلان
إشمعنى يبقى معاه ..
كل اللي بترجاه
لو تُهت في المشاوير
يارب ما تسبينيش
و تدبر التدابير ..
عبدك مفيش حيلئه
غير حبة التفكير ..

العبد الفقير

يارب متسبينش هنا
وسط المعاصي و الذنوب ..
يارب أنا جايلك و أنا
بدعيك عشان تهديني أتوب ..
يارب يا أكبر كبير
يارب أنا العبد الفقير
يارب يلمّفي القلوب ..
ثبّني دنا لسا يادوب
بادئ أجيلك ع الطريق
يارب بترجاك أنا
وسّع طريقي لو يضيق ..
يارب متسبينش غريق ..
عبدك ضعيف
ظالم و من جواه برئ ..
و إنت أدري بالقلوب
يارب أنا جايلك أتوب ..

يادوب تلحق

فاضلك بس كام ثانية .. توذّع فيهم الدنيا ..
و تندم ع إللي فاتميك .. و معملتوش ..
و تترحم على العايشين .. عشان معاشوش ..
يادوب تلحق ..
في كام كلمة و باستعجال
توصي ولادك إللي مجوش ..
تسددين قديم عنك .. ماسدنتوش ..
و تبقى تحوش ..
من التركة سبيل الله
و تكتب فوقه ما معناه ..
بان الكل هيفارق
و مش واخذ حبايبه معاه ..
و أي حياه أكيد فانيه ..
يادوب تلحق و تتشاهد
مابين الشهقة و الثانيه ...
فاضلك أقل من ثانيه

- و الدنيا دي إيه غير فريقين ..مساكين بتعقل مجانين ..مجانين بتساعدمساكين ..و دواير بتلف دواير .. و أنا حاير .. فرحان و حزين ..و حزين فرحان .. كان في الإمكان ألعب لكن .. مش لاقى مكان في الفريقين ..
- أنا ساكت .. لا هتكلم ولا أحكي كثير ..و لا بقى عندي روح أصلاً .. كُتِر الشرح و التبرير ..أنا الرؤيا .. و أنا التفسير ..و أنا الثابت .. و أنا التغيير ..فـ قول كذّاب .. و قَل بيننا مليون باب .. كفايه عليا إني أبقى .. مِصَدَّق نفسي في التفكير ..
- الصدى أحياناً بيغير .. أكثر م الصوت ..و العيشة المرّة بمفهومها .. أسوأ م الموت ..و الغربية ساعات بتكون ساكنه .. في بلاد و بيوت ..و براح في تابوت .. عمال يقنعنا إنه يساعنا .. و معاني تفوت و بتخدعنا .. و الآخر بنلاقي المعنى .. مش جاي مطبوظ ..
- و بتنسى الجاكت ع الكنبه .. مع إنك لسه بتستهوا ..و ما خدّتش م الدوا حبايه .. من قبل ما تنزل ع القهوة ..أُبيت الشاي في الكوبايه .. و ما شيلتِش تجميع الرغوة .. لئنيا براح وانت حابسها .. و مفيش ولا حاجه بتدرسها .. كَمَل في حياتك نواقصها .. قبل ما هتفارق على سهوه ...

الوضع الراهن

حول الأوضاع .. و تطوّر أحوال الدنيا .. يأتينا مراسلنا أحمد .. الواقف في
الناحية الثانية ..

- حسناً أحمد

- شكراً / فعلاً .. الوضع الراهن قد يعكس .. تأثيره السلبي على الأحداث .. و
إزاي الناس عايزه تشوفك .. و إزاي بتشوف ف عنيك الناس .. على أي أساس
ناوي تكمل .. و الخوف ترباس قافل بابك

هذا .. و بموقف أحبابك .. مين واقف جنبك - و لماذا ؟ .. هل كان يعرف ؟ ..
هل جمل الجي من الدنيا .. خلك من غيره بقيت أضعف ؟ .. و سئسفر عنه
الأيام .. أم إن الباقي من الأحلام .. خلك دلوقتي بقيت أجمد ؟
- شكراً أحمد ..

هذا .. و بحق سنين عشره .. و بحق ما فاتني .. و حق ما ضاع .. أشكركم في
نهاية النشره .. للموقف حول الأوضاع ..

و يبشرب شايه ف بلكونئه .. كان ناسي يفكر في حكايته .. و مركز مع واحد
جاره .. ساعتين بيكلم في مراهئه ..

تعرف على المزيد من التطورات في التقارير التالية

إختيار صحيح

بين الأسود و الإسود
واقف تايه مختار ..
و بفكر مليون مرّه
و لا باخذ أي قرار ..
و إزاي هقدر أختار
طب فين هتكون الخيرة ؟
بين الأسود و الإسود
فرق ف درجات الحيرة ..
و قراري يفض السيرّه
و يريح كل الناس ..
و أنا و بكامل وعيي
هختار إسود و خلاص

إثنين أنا

أنا قاعد دلوقتي معايا
بنبُص لبعض ..
و ندور فيما بيننا نطّلع
في الاختلافات ...
أنكر ينكر
أضحك يضحك
أزعل يزعل
و نبادل بعض الاتهامات ..
مش جايز تبقي المشكلة فيك ؟
أو جايز فيك ..
طب جرّب حُط إيدك في إيدك
شوف مين هتطبُط ع التانيه ..
أهو ده إللي بناخذه من الدنيا ..
نتقسم إثنين جُوه الواحد
و نبُص لبعض ..
قطّعنا هدومنا بطول و بعرض
طب داخنا إثنين ..

قاسمين لحيّة شمال و يمين
و ما بيني و بينك محض خلاف
ع البني آدمين ..
و بنام علشانك قافل عين
و مفتّح عين ..
بقي نبقى إثنين
جوه الواحد
و الواحد يقسمنا إثنين !
و كمان قاعدين بنبص لبعض ..
فرجنا علينا كلاب الأرض ..

كل اللي كان باين زمان
بيقولنا ..
إن إحنا الاتنين شكلنا ..
كل اللي شافنا في الطريق
أمن بنا ..
إيه إللي جابنا من الأساس
أصلاً هنا ؟
و أنا مين أنا ..
و إزاي أنا ..
مفروض أنا ..

ألا فيك تقولي لأ دنا ..

يادي الهنا ..

طب حد فينا كان يكون

أكبر من الثاني بسنه ؟ ..

أصغر سنه ؟ ..

بالعقل يعني إزاي يكون

إذا إحنا لـ إثنين نبقي أنا ..

و إزاي أنا حاسس ببعده

مع إن فيا إثنين أنا

بأصين لبعض ..

و برغم الوحدة ف تفاصيلكم

و هزيل الجسم إللي شايكم

و أدوار البرد أما تطول

لما تجيلكم ..

لكن في الآخر قررتوا ..

و حسبتوا المكسب

و خسرتوا ..

فقسّموا القسمة على الواحد

و جوّزتوا الفرد ..

سبتوه إثنين قاعدين دائماً

بيبصوا لبعض ...

قد صدّقتَ الرؤيا

مات أد إليه مِنِّي
فات أد إليه م الوقت ...
دا العُمر نيمني
طب ليه صحيت دلوقت
جايز عشان صدقت
في الحلم رؤياكم ..
جايز عشاني بدأت
أضعف و أنساكم ..
جايز في جواكم
شئ ليا صحاني ..

....

جايز صحيت عطشان
هشرب
و أنام تاني

عَيْلٌ كَذَابٌ

(١)

كان لَسَه الواد حَتَّة عَيْلٌ
و الدُنْيا كانت لسه بخير ...
و الفضا كان أوسع م الدُنْيا
و ف عَيْئُه كان أوسع بكتير ...
الصالة كانت لسه كبيره
كان لسه بيحبي على حصيره
و يقوم يتسُدُّ ع الباب ..
و يُقع - فيمئل - فيعيط
و العَيْل طبعاً كَذَابٌ ..
كُل الألعاب كانوا صُحَابُه
قطر المعَيْلُه أخذُه و جابُه
م اللّعب و م الضحك و سابُه
على أولسِكَّة متاهات ..

(٢)

الدُنْيا ماهيش زي الأوّل ..
و الفضا مش أوسع م الدُنْيا
و العَيْلُ عُوْدُه بيتحوّل ..

و الواجب مابقاش ببيطول
و الواد بقي أطول م الباب ..
و يُقع و يقوم و لا بيعيط
بيمئل - طبعاً كذاب ..
و فكل كتاب هامش مكتوب ..
جواه حرفين و دموع و قلوب ..
و قصايد عن عشق المحبوب
و رسايل حُب و جوابات ..

(٣)

الدنيا بقت أصغر و أصغر ..
و الفضا بقي أضيق م الضحكة
و الواد بقي بين الناس أكبر ..
بقي يشخط - يشتم - يتأمر
يتعصب - يخبط في الباب ..
و يُقع و يقوم و لا بيعيط
بيمئل - طبعاً كذاب ..
أحلامه سراب عاش يطاردها ..
و الينت بتبعده - ساب إيدها ..
و الدنيا بتخلف مواعيدها
و بللكة تزيد المسافات ..

(٤)

الدُّنْيَا بَقِيَ نَاصِيَةٌ حَارَهُ ..
وَالْفَضَا بَقِيَ شَارِعٌ مَتَسْفَلَتْ
وَالْوَادُ بَقِيَ رَاجِلٌ بِسَجَارِهِ ..
دَايَخٌ فِي الدُّنْيَا الدَّوَارَهُ ..
يَتَعَكَّزُ - يَسْنِدُ عِ الْبَابِ
وَيُقَعُّ - يَتَأَلَّمُ - فَيُعِيطُ
دَلُوقَتِي الْوَادِ مَشْ كَذَابٍ ..

المجنون

يا سحر الكون
يا هذا الكوكب المسكون
أنا تايه - أنا مجنون
ساعات من ده
ساعات من ده ..
و أنا العايش كتير بين ده
و بين نذاهه
لو تئده
أموت مفتون ...
يا سحر الكون ...
أنا الشارد ..
و فارد للهوا صيدي ..
سبقته الدنيا و التواريخ
ميلادي و أجنبي و هجري
سنين تجري
و أنا لجل الوصول مرهون
بقيت الليل

بقيت ميمون ...
و برقص ويا ضيل الحيط ..

و سبت البيت - هربت بعيد
لقتني رجعت نفس البيت ...
زهقت و جيت
و فضلت اني أعيش مجنون ...
يا كل الناس
ف هذا الكوكب المسكون
سباق الدنيا في الآخر
سباق ملعون

فيها إن

كل حاجة م إللي عشنا
بنقابلها و بتقابلنا..
ليه تملي بتيجي دائماً
فيها سيئه..
ناقصة سيئه..
زايدة سيئه عن مقاسنا
جايز الترزي إللي قاسنا
بدل المقاسات ما بيننا..
كل حنة نقش حنه
جيه ناقص منها كف..
كل مره أهم ورقه
تبقى ناقصه من الملف..
كل سلّم ناقصه طالع
كل شار عناقصه لف..
كل صف بيبقى ناقص
حد منهم / حد منا..
لسه برضه فينا سيئه..
كل حاجه ناقصة حاجة
كل حاجه فيها إن..

كاروهات

طول عُمرِي بحب الكاروهات
علشان بتكرَّر أشكالها ..
مُتقاطع - مُتعامِد - غامق
مُتشابك - شابِك تفاصِيلها ..
مُتوازي و مُتداخل - فاتِح
يدخُل ع الشبَكه يكملُّها ..
و يشدِّك إنك تدخُلها
تبدأ ب كاروه
ف كاروهف كاروه
فعنِيك بتز غل - فجأه تتوه
ترجع من تاني لأولِّها ..
تبدأ ب كاروه - تحسِب مسافات
و تعيد حسابات - و تعدِّلها ..
توصل ل كاروه - شبه الأول
ترجع م الأول - تفصلِّها ..
توهتِك في الشبَكه كتير تشبه
توهتِك في الدنيا بحذافيرها ..
مُتقاطع - مُتشابك - شابِك
عُمرِك ما هتوصل لآخرها ..

خلاف قديم

رغم إنك هُوَ هُوَ
في الطبيعه و الملامح ..
إلا إن الصُورة جاييه
إختلافكوا بشكل واضح ..
هو خَد دور المسامح
رغم إنه مش كريم ..
إنت شر بشكل فاضح
رغم إن إنت الحليم ..
إللي بينكوا كان قديم ..
من بداية لـ إختلاف
إنت تهدي
هو يجرى
إنت تطمن
يخاف ..
إنت شفت و هو شاف
بس عينه مش بعينك ..
إنت شفت الموت - جريت
هو شافه و قاله فينك ؟

إنت أفعالك تدينك
هو شفعاؤه المحبه ..

إنت تَدِّي
هو يأخذ
إنت حبه
هو حبه ..
إنت قُلت و هو خبي
لما كان مفروض يقول ..
إنت تمشي
هو يركب
إنت أرنب
هو غول ..
و الكلام بينكم يطول
كلمه سين على كلمه جيم ..
كل واحد فيكوا وافق ..
يبقى نُص فـ شئ سليم ..
نُص رافض
عاش أناني
نُص تاني
مات غشيم ..
كل شئ في الصورة أثبت
إن بينكوا خلاف قديم ...

ضار جداً بالصحة

مع الدخان
بتنفخ مين ...
و مين كان ضار بالصحة
عليك أكثر من النيكوتين ...
و كان أخطر ..
و عدى إزاي من الفلتر
وَصَل للقلب
و الرنتين ...
أخدت الناس مع الأنفاس
بقيت مُدمن على وصالهم
قَدِرت تبطل النيكوتين
و مش قادر تبطلهم

بُساط الريح

بساط الريح

كحل مُريح من الدنيا

ماهُوَأش موت...

و أشوف من فوق

بلاد و بيوت..

بحور و شطوط..

..

معايا ريموت

عملت Mute لصوت الناس

سمعت كلام ورا كلامهم..

سمعت اللعنه في سلامهم..

وقففت حقيقي فُدامهم..

و مستغرب..

...

و نور القطر بيقرب

وداع و محطة و مسافر..

شُنط فاضيه

و مناديل الوداع راضيه

خروج اللحم م الضافر..

وداع كافر

..

و بَغْرَبْ..

..

سنين العُمر بتسرَّب

أمل و طموح..

و بتقَرَّب رقم مطروح

أرُوح

و أحسبها من تاني

تزيد واحد

و وحداني..

و أحسبها

تزيد تاني..

ف حُفَّت أنام

سألت هناك - مفيش سبَّاك

يحافظ ع اللي جاي قدام ؟

قالولي العُمر فيه كام لتر

عشان تستني و تجرَّب..

دا نُص العُمر راح منك

و نُصه التاني بيسرَّب..

و بتهرب
من الحاجه ف حاجات تانيه
أقول أكتب / و أكتب غير..
كتبت كتير..
لذلك ..
هو حل أخير..
مفيش عندي حلول تانيه
ماهيّاش موت ..
...
بُساط الريح
ك حل مُريح من الدنيا-
ريموت و Mute

هتودَّعُه ؟

هتودَّعُه ؟

كان شئ و لازم

م القديم هنطلَّعُه ..

فات المعاد

حتي الفُعاد

مايقاش هيقدر ينفَّعُه ..

خُد من سنين العُمر

حَبْ و وزَّعُه ..

خُد عُمرِي كُلُه و رجَّعُه .

طعم الرحيل راح يوجَّعُه

هتودَّعُه ؟

و تودَّعَك ؟

و تودَّع الكِتفِ اللِّي كان

مستجدك ..

مش هسمعك ..

ما يقاش بايدي أمتعك

و لا أمتعُه ..

وقت الطريق ما ييفترق

ولا حاجة تقدر تجمعه ..

ما أشجَعَكَ
ما أجدَعُه ..
طَبِّبْ بِسِ حَاوِلْ تَسْمَعُه ..
أَوْ وَدَعُه ..
أَوْ قَوْلْ لُبْكَرِهْ بِتَاعِ زَمَانِ
زِي أَمَا جَابُهْ
يَرْجَعُه ..

زُهد الحاجات

كُل حاجه بالتأني
حبه حبه تكون معاك ..
يبدأ الموضوع تمنّي
ينتهي بالإمتلاك ..
يعني تبقى قُرب إيّك
بعد ما كانت هناك ..
فجأه يتغيّر هواك ..
و الخيال جُوك يعانداك
يشتهي الحاجه الجديده
يزهد الحاجه اللي عندك
فالحاجات بتضيع بعندك
قبل ما بتفرّح بخيرها ..
بعد لما تبقى ملكك
نادراً ما بتفتكرها ..
حبه حبه بالتأني
الفراق بيكون مصيرها
كُل حاجه في التمني
في النهايه زي غيرها ..

الفرار

لحظة سكوت قبل الفرار ..

لحظة سكوت وسط الهزار ..

صدّق إللي قال

إن السكوت معناه فرار ..

مين إللي شار

ع القلب يسكّت ع الكلام

إيه إللي خَلّى ضميري نام

ليه اللجام

علمني حُب الإنكسار ...

ليه الكلام

زي البُخار عمال يطير ..

ليه لما يتفرض الكلام

بَسكّت كتير ..

كان فاد بإيه يعني السكوت

قبل المصير ...

مفیش اِتنین

ما تَقْنَعْنِش
مفیش واحد بیرضی یعیش
عشان خاطر واحد غیره...
و لو کان فیه
فَد تفسیره
بانہ مریض فِ تفکیره ..
و دَا کبیره
یادوب برضی یعیشلہ یومین..
و لو کان مین..
شویہ و یرْفُض إنه یعیش
مفیش اِتنین ..
ما تَقْنَعْنِش..

صدق أو لا تُصدق

و صدَّقْتَهُ
ما صدَّقْتَوْش ..
قريئهُ و لآ ما قريئهُوش ..
أكيد كل الورق هيبوش
و سايب بين عينيك فكره ..
يجوز تنفع ليوم إسود
و ممكن
قد يكون بُكره ..
يجوز هتصحِّي فيك ذكرى
بتأثير الحروف و الخوف ..
و تكشف عنك المسافات
و ترجع بالزمن و تشوف ..
ظروف كل إللي ما نسيتهوش ..
شريط عابر سبيل زيك
و جالك قالك إزيك ..
و أنا زيك ما صدَّقْتَوْش ...

حاول تصنق إللي جاي ...

بطاردني

بطاردني ..
و بهرب من أنا و مَني ..
و أصمم إنني أتداری
فأصمم إنني أمسکني ..
و آجي شمال
أجيلي يمین
أنا حالف علیا يمین
لهاجي فدمره و هجيني ..
و هضربني ..
و أعذبني ..
لحد ما أبكي علی كتفي
و أحن لنفسي
فأسيني ..

كُنَّا سَبْعَهُ

كُنَّا سَبْعَهُ
وَيَا بَعْضَ نَرُوحِ وَ نِيْجِي
أَيِّ وَقْتِ وَ أَيِّ حَتِّهِ ...
جَامِعَهُ مَاشِي
قَهْوَهُ مَاشِي
أَيِّ هَلْسِ وَ رَمِيْجَتِهِ ...
بَسْ مِنْ بَعْدِ الشَّهَادَةِ
كُلُّهُ كَانَ عَمَّالٍ يِعَافِرُ
شَالَهُمْ مَوْهُوَ رَاحَ مَسَافِرُ
خَدَّهَوْمُهُ وَ سَابِنَا سَيْتَهُ ...
سَابِ جَاكَّتِهِ لِحَدِّ فِينَا
وَ قَالَهُ ذِكْرِي
رَدَّ قَالَهُ عُمْرِي مَا انْسَا ..
شَالَهَا عِنْدَهُ وَ يَوْمَ جَوَازِهِ
كَانَ لَابِسَهَا وَ سَابِنَا خَمْسَهُ ..
فَاتِ شَهْوَرِ
وَ عَمَلْنَا حَادِثَةَ

كان سببها الصريعه ...
طيش شباب و هزار سواقه
و ضحك فاضي و مرقعه .
و التمن كان حد غالي
مات و سابنا
أربعه ...

صدمة كانت مفعه
لما ففنا قالولنا مات ..
و أما واحد فينا كمل
باقى عمره بعكازات ..
كان بيمشي تاتا تاتا
فد الألم خناه يسيبنا
للخطاوياحنا التلاته ...
بالمعارف و الوساطه
و الرشاوي و الهدايا ..
جاله تعيين جه قبلي
راح و ساب واحد معايا ..
و النهايه ...
نيجي ع القهوة و نحكي
مره
كل فين و فين ..

و المسافَة تزيِد ما بيننا

و الشهور

بتحبيب سنين ..

...

باقي مين ؟

غير حنين الروح و دَمعه

و صُورَه كانت باقيه عندي ...

و أفِكر لوشُفت جامعَه

ولما جنب القهوه أعدّي ...

إن إحنا كُنا سبعه

و إني في الآخر

لوحدي ...

الضلمة فيها مكان

الضلمه ليك وحدك
يا زاهد الملكوت ..
قسّم بمعرفتك
أرض و بلاد و بيوت ..
سحر و ذهب و ياقوت
كنز الملك سليمان ..
الضلمه ليها بيان
حابسك عن التشويش ..
ورا كل باب موجود
بدله ، و شيخ و شاويش ..
تخرج من الضلمه
تلقى الدماغ شواكيش ..
يا هناه يامين هيعيش
ساعتين مع الضلمة
حيث الطريق ممدود
حيث البراح مفرود
حيث الخيال موجود
حيث الولد محسود

حصوه في عين الناس
و شافوني و ما صلوا ..

حصوه ف عين إلبلي إنداس
بالعمر ما وصله ..
حصوه ف عين الخباز
أكل الرغيف كله ..
طب مين يوصله
عبر الظلام إحساس ..
حصوه في عين الناس
و الخرزَه فوق كفي ..
خايف لا نتأخر
و العمر ما يگفي ..
و إشمعني أنا صقي
بين الصفوف خسران ؟
جربت أعيش الدور
ما لقيتتش ليا مكان ..
و مكانش في الإمكان
غير إلبلي كان عندك ..
الناس تعيش في النور
و الضلمه ليك وحدك ...

اللعب ع المكشوف

تفتّطها ..

و تقسم بين ورقها كثير ..
تجيب أولها في الآخر
تسيب أواخرها للمشاورير ..
و لو كان الورق فيه خير
أكيد كان جابلك البصره ..
هناك شايب في كوتشينتك
أخذ كل الولاد أسرى ..
كسبت من السنين أعداء
خسرت فكل دور حسره .
شريط العمر فيه كسره
و مين يعدلك المايل ..
و مين كان م الأساس شايل
و مين قايل ..
بان القوه هي السيف

تفتّطها

و تأخذ سيف ..
شعورك باللي جيّ مخيف

مابين أصلي و بين الزيف ..
تزوّد سيف
تخاف أكثر ..

و ليه ع اللعب مستكتر
شوية خوف ؟ ..
ياريت نلعب علي المكشوف
و شوف بين الورق كومي ..
أكيد لو ضاع - ما راحش بعيد
يا في هدومك
يا في هدومي ..

الضحك من غير سبب

مش عارف تضحك على إيه ؟
إضحك ع الساعة إللي فد إيدك ..
و الفرصة الضايعة فد مواعيدك
إضحك على زيدك و عبيدك ..
و إضحك ع الخلق الماشيين ..

كل الضاحكين إللي شايفهم
في الأصل أساساً مساكين ..
ساييين أرواحهم في همومهم ..
لابسين ملامحهم و هدومهم ..
برفانهم ييجي على قدومهم ..
تحسبهم عادي و عايشين ..

لو كنا هنفضل فاكرين
الجزء المُظلم في الماضي ..
كان يبقى الموت وقتها عادي
إضحك ع المليان و الفاضي ..
إضحك على بُكره إللي مجاش ..

أهو لولا الضحك على همومنا
صدقني محدش كان عاش ..
إضحك مجاناً ببلاش
مايهمش فين أو مع مين ..
مش عارف تضحك على إيه ؟
إضحك على خيبتك يا حزين ..

إشارات

الدنيا شوارع زحمة
و فكل مكان إشارات ..
و رصيف أكبر م الشارع
و حواجز و مطبات ..
الناس في الزحمة مواقف
الكل بيمشي و خايف
مع إن الأتوبيس واقف
و مفيش في السكة حارات
تروماي العشرة البايئة
ما بقاش في بلدنا يعدّي
صندوق البوسطة مصدّي
إكمن مفيش جوابات ..
فارش بيبيع غيارات ..
إسئر نفسك يا حزين
قرب خُدلك غيارين
و فانله و جوز شرابات ..

سارح بالبوظه البايظه
مع إن الناس مش عايزه
علشان كان كله بيشر ب

مُر الأيام في كاسات ..
الناس مش طايقه الناس
مابقاش في قلوبهم رحمه
دي الدنيا شوارع لحمه
و ديايه في ميكروباصات ..
لَمُوا الأجره يا حضرات
مع بعض عشان نازلين
طب مين هيفك لمين
و الكُل معاه شلنات ..
أما إنتي غريبه يا دُنيا
و عليكي ساعات حركات ..
مليانه شوارع زحمه
و مفيش فيكي محطات

هل هي حقيقة ؟

حبيت بهدنتي و مدرستي .. و حروف إسمها على كراستي .. و الشعب
بتاعنا أما بيقتي .. و يقول دا عيال ..
حبيت الطوق جنب التوكة .. و حبيت الشال ..
حبيت خلخال حايره فصوصه .. و إيشارب الشعر و دبوسه .. و الخد اللي أنا
نفسي أبوسه .. و لكئه مُحال ..
و أنا غرضي حلال ..
دنا هكبر بكره و هطلبها .. و أعطش م الدنيا و هشربها .. و هسبد ماسورة
خطابها .. و القيل و القال ..
أنا عايز بس أما هشوفها .. أمسك أعصابي و أوقفها .. و أسألها سؤال ..
هو إنتي أساساً حقيقة .. و لا إنتي خيال ؟

كتبك له ؟

لعاشير مرّه بكتبك .. جواب واحد ما كملّوش .. و قلمي مُصرّ يكتبك .. كلام
تاني أنا ما قلّوش ...
و قال يعني بييجي يحوش ... رتوش الشخّط م النبرّه ... و طول عُمر
السُطور صابره .. عليه و عليا و عليكي .. أز عَقْلِك .. يهدّيكي .. و يكتبك ..
فأمحكي .. فخلّكي بعيد عني .. تعبت معاكي مش هقدر ..
باقيلي سطر مش أكثر .. في آخر ورقه في الدفتر .. لقيت قلمي كاتبك
فيه إحليفت عليه .. و هدّدت إن أنلّه بريه .. و جيت ع السطر لجل أشطب ..
لقيت نفسي كتبتك ليه؟! ..

المُخلص

روحين

و قالولنا إننا روح بين جسدين ..
و إننا واحد مقسوم نُصين ..
و إننا فاهمين
عن بعض الظاهر و الخافي
و إن إلهي ما بيننا أكيد كافي
علشان الدُنيا ما تجبرناش
نمشي ف طريقين ..
و شربنا الخِدعه و ما فهمناش
غير بعد ما راح العُمر بلاش
غلطتنا إن إحنا ما صدقناش
إن إحنا إتنين ..

و مين عارف

و مين عارف
ما جايز بكره نتقابل
فِ صدفة هتيجي تجمعنا ..
و نعمل نفسنا عُربا
و نكتم فينا أوجاعنا ..
برغم إن إحنا مخترناش
ولا سيينا
ولا بعنا ..
لكن كان فينا شئ خايف ..
بيظهر في الكلام لكن
محدث فينا كان شايف ..
و جايز تاني نتقابل
و مين عارف

جيت متأخر

أنا يمكن جيت متأخر
لكن أحسن ما أغيب...
العمر سنين تتبخر
لكن في لقانا نصيب..
العمر حبيب و حبيب
و إتقابلوا ف آخر ساعه..
و ثواني تزق دقائق
بتزق عقارب ساعه..
تنهيده تقول حواديت
و إيدين ماسكة السماعة..
العمر دا كان شماعة
علقنا عليها العيب..
و لا كان بإيدينا نفارق
و لا كان بإيدينا نغيب..
العمر معاد و مجاش
و الصدفة تعيش و تجيب..
و الكل مسيره يغيب
و سنيه هناك تتبخر..
لكن هيجيله اليوم
و هيجي ولو متأخر..

شبابيكي

و العُمر يطلع إيه
غير إني ألاقكي ...
و تشقشقلي نهار
و أفتحه شبابيكي ..
تبقى شباب بيّا
و أرجع شباب بيكي ..
تاهت سنيني سنين
و وصلتلك عثمان ..
ألقي إللي ضاع منّي
و إللي خسرته زمان ..
حُضنك زمان و مكان
و أمان في ضواحيكي ...
العُمر مش تواريخ
و لا يتحسب بالشيب ..
العُمر إن إحنا
يبقى فلقانا نصيب ..
العُمر كان يانصيب
و أنا فُزت بعنيكي ...

لسه المكان هُوّاه

نفس المكان هُوّاه
نفس الشجر و الضيل ..
لسّه المكان جُوّاه
شئ كلّ مادا يقل ..
لسه المكان بيذل
إثنين بعيد عنه ..
واحد رحل منه /
واحد بتستناه ..
لسّه المكان هُوّاه ..
لسّه الكراسي حديد ..
لسّه اللقا صدفة
لسّه الفراق مواعيد ..
و أنا وانتي لسّه بعيد ..
عايشين على ذكراه ..
لسّه المكان له إيد
بتداري حاجه وراه ..

أصوم لكن

أصوم عن زاد و عن مِيَه
و عن كل المُتَع و الناس..
و عن نومي و عن قومي
و عن شهوه و عن إحساس..
و عن وسواس و عن كلمه
أقولها لحد غير ليها
و عن حُضن الإيديين إلا
إيديا وهيا في إيديها..
و أصوم فيها و أتسَحَّر
و أحلِّي معاها و أشرب شاي ..

...

يا سيدنا الشيخ أنا فاطر
أكفّر عن عنيتها إزاي ؟ ...

خلبوص

أنا أصلاً
مش عايز أصلحك ..
و لا أبوس الإيد دي
ولا التانيه ...
و لا عايز أجيبسيرة ثانوي
و لا كنتي فد أولى
و أنا فتانيه ..
و لا إني ما نمتش ولا ثانيه
و لا هاجي أتأمل في ملامحك ..
أنا أصلاً
مش عايز أصلحك ..
ولا هاجي أتلكك و أتكلم ..
و أفتح مواضيع و أمسك إيدك
و أستهيل قال يعني بَسَلِم ..
و لا أقولك قلبي بقى مضلم
و لا أقولك سامحيني و أسامحك ..
أنا أصلاً
مش عايز أصلحك ..
...

و لا أقولك إنتي وحشتيني ..
و لا أقولك إن أنا تايه
مستتي عنكي تنجيني ..
و لساني يجيبي يوديني
و الأقيه في الآخر
بيصارك ..
أنا أصلا
جَيَّ عشان أصلحك ..

إستعارة مكنية

حروف الجر مش قادرة
تجيلي إسم موصوفك ..
ضمير عايد على حُسنك
بيكتب ضمّه تشبهلك ..
على مهلك
يا نون النسوة في حروفي ..
و خبّري و حالي و ظروفي ..
يا إما تميلي
يا تشوفي ..
طريقة لجل ما أبوحك ..
سُكون أو كسرة أو فتحة
أجيلك منها و أروحك ..
أنا في محل م الإعراب
عن الحُضن اللي مفتوحك ..
و لو ما بتعرفيش في النَّحو
فانا نَحوي ..
أكيد نَحوك ...

- جايك بتعلم يا صبيّه .. و ف ايدي دفتر أحوالي .. جايك و أنا أمي .. و أنا أمي .. داعيالي تكوني أم عيالي .. قايلاي ماجيش غير و أنا ناجح .. إيه رأيك في الوضع الحالي ؟
- فُكّرْتِي ..دنا كنت هنسى الإتفاق .. إن إحنا مش لايقين لنا .. و مفيش ما بيننا طريق وفاق ..عقلي اللي فاق .. كان فاكر إنك بإشتياق .. رجّعْتِي ..لكن عشان بيننا إتفاق ..فُكّرْتِي .. وْتْنِي ..
- آخر حلولنا الورق .. آخر الورق جوابين ..آخر الطريق مُفْتَرَق .. آخر الفراق طريقين .. آخر سنيننا إْتَسْرَق .. طب مين يسامح مين ...
- آخر عتاب متساب .. مع كلمتين في جواب .. آخر جواب إْتجاب .. من تحت عقب الباب ..
- بمناسبة ذكرى أما قابلتك .. و اليوم يبقى العيد السنوي .. أنا عايز أقولك يا حبيبيتي .. أنا عاشقك من أيام ثانوي ..
- لَمَّا بيقى معادش فاضل .. غير أفاضل .. نبقي نشكي .. و أما نبقي بين كلامنا و إنسجامنا .. نبقي نحكي .. و أما بيقى ييجي آخر .. للأوخر .. نبقي نبكي ..
- بقيت فاتر .. بقت فآترة .. علاجكم في الغياب فترة ..
- الجُزء الناقص في الرسمة .. أكبر من مُجمل أعمالي .. إزاي أنا هرسم ف شفافيك .. و أنا راسم عينك بصّالي ...
- بين "يارب" و بين "ياريت" .. بيقى فاضل بيننا خبط ..

على المسرح

في عرض الدنيا ع الخشبه
معاك دور ايه ؟ ..
في نفس الساعه يومياً
بتطلع ليه ؟ ..
يادوب كام كلمه بنقولهم
و كام إفيه ..
أنا صدقت يوسف بيه
ساعة ما وصفها بالمسرح ..
وشوش كومبارس شكل الناس
في نفس الزاويه و المطرح ..
و دور يشقى
و دور يجرح ..
و دور دار البلاد يسرح
بيلعب دور ماهوش دورهُ ..
و دور واحد في دور غيره
و مين كان جه في تفكيرهُ
يُفّف من برّه يتفرّج ..
يشوف الدنيا بتهرّج

بتدخّل فيها تتخرّج
ممثل نجم ع الشباك ..
و متخافشي
عشان الكل بيمثل
بدورُه معاك ..
على المسرح
هلاك في هلاك ..
و دور مايقومش بيه إلك
هناك تلقى الستار مفتوح
و ناس أدت أداء مفضوح ..
و ناس ساكته
و ناس بتبوح ..
و ناس بتروح في دور أحزان
و ناس جيّه عشان تفرح ..
على المسرح ..
بلاد و ديكور
و بقعة نور على السكة ..
و ناس تلعب في أدوراها
و ناس تقعد على الدكة ..
و ناس رُزّمه

و ناس فكه ..

و ناس كان دورها دور سكه
لا بيقدم ولا ياخر ..
يجوز العرض يتاخر
عشان بيئه القديم شغال ..
بيعرض م اللي فات لقطات
لـ دورنا لما كنا عيال ..
على المسرح
بطول أميال ..
زحام الناس في أسوارهم
ولا بيختاروا أدوارهم
ولا دورهم بيختارهم ..
شطارتك و إنت ع المسرح
تكون إزاي هتكسرهم ..
عشان دنيا يادوب في العرض
هتكسبها
و تخسرهم ..



حظك اليوم

دايمًا تتخيلُ بكرة
هيجيب الدنيا معاه ..
و تموت لو تعرف مرّه
هيجيبك إيه وياه ..
بس المجهول أحياناً
أحسن لو ما عرفناه ..
فد بدل ما تحاول تعرف
أحسنك تستناه ..

برج الحمل



من ٣/٢١ إلى ٤/١٩

يا نصيب

تروح تيجي
تجيب و تسيب
يضيع العُمر جُوه الشيب ..
توصي الحلم على بُكره
يموت بُكره في علم الغيب ..
و ما في الجيب ..
تمن آخر رهان يانصيب ..
تراهن ع اللي جيّ هناك
فتخسر كل حاجة معاك ..
بياض الشّعر مع بُكره
و جيب فاضي بيترجاك ..
كفاية و سيب
خسرت الجيّ و الريح
ف حاجة مالکش فيها نصيب ..

برج الثور



من ٤/٢٠ إلى ٥/٢١

ما بنشوفهاش

النجدة مش في الناس
علشان ماتطلبهاش ..
مُعظم أيادي الخلق
في الجَد ماتلاقيهاش ..
و الشاش مداري كتير
بيجي ألف تعويره ..
من أهل - من أصحاب
من عشرة - من جيره ..
بين كل كاخفره
هتلاقي دوحديره ..
كل الوشوش عيره
كل الكلام ببلاش ...
نجدتنا فينا إحنا
و إحنا ما بنشوفهاش ...

برج الجوزاء



من ٥/٢٢ إلى ٦/٢١

الهروب جائز شرعاً

و تبعد ليه ؟
و تهرب من حاجات ساكنك ؟
و مين قال الهُروب شرعاً
يجوز على ناس بتتمناك ..
هتبعد أد ما هتبعد
و توعد أد ما هتوعد
هتلقاك برضه في بعاذك
واخدها معاك ..
قد تبعد ليه ؟
ما دام الحُب مكتوبك
و هيقابلك
هنا و هناك

برج السرطان



من ٦/٢٢ إلى ٧/٢٢

مش بإيدك مش بإيدها

المشاعر بينكوا ثابتة
باردة إيدك - باردة إيدها ...
الحنان إللي ف شفايقك
لسه تايه عن حدودها ...
لسه هيا كتير بتهرب
لما بتقرّب حدودها ...
عُمر ما الإنكار يفيدك
عُمر ما الإنكار يفيدها ...
الحقيقة واضحة جداً
و الزمن عمال يعيدها ...
...
لسه فيه بينكم مسافه
رغم إنكاركم وجودها ...



المسافات

علمني القُرب حاجات ياما
علمني البُعد حاجات أكثر ..
إنك لو سببت تكون شاطر
بس لو إتسابت تكون أشطر ..
و مفيش في الدنيا حاجات أخطر
من ناس بتقرب أوي من ناس ..
و إن الترياس - بالوقت - مُفيد
و إن تلبّك هيكون أامن
لو كان مليون قُضبان و حديد ..
و إن التهديد إنك تبعده
بيكون أحسن م القُرب ساعات ..
ف عشان تبقى قُريب دائماً
أحسنلك حافظ ع المسافات ..



كل أما تخاف

و قالولي إن اللي تخاف منه ...
هتلاقي مفيش أحسن منه ...
و اللي بتظمن بوجوده
هيجيلك يوم تبعد عنه ..
و هتعرف إنه معاك دايماً
معكوس و معاكس خِلف خلاف
كل أما تخاف
ترتاح أكثر ..
كل اللي إتشاف حجْمُهُغَيْر
بيداري حاجات أكبر و أكبر ...
كل اللي تعوزُه هيتأخر
و الغير مرغوب اللي بيوصل ..
...
مع ذلك برضُه أما بخاف
كل اللي بخاف منه بيحصل ...



قول يارب

ألامك كل يوم بتزيد
و صابر ع المرض و بلاه ..
بتدعي و إنت مطمئن
و متعشّم في وجه الله ..
فاتوك الناس
يا حول الله
تحارب قلة الحيله ..
مفيش صاحب ببسأل فيك
ولا عشره ولا عيله ..
و حكمة ربنا إله
يخفف عنك الشيله ..
و كل أما الوجع بيزيد
هـ تيكيله و تترجاه ..
عشان ربك أحن أكيد
عليك من أي حد سواه ..



المفترق

كُل الطَّرْق واحده
طول مانتا مش عارف ..
كل السكك ضلمه
طول مانتا مش شايف ..
كل اللي جه خايف
صندوق طموحه إتسرق ..
كُل إللججه تايه
لساه على المُفترَق ..
بين الذمّوع و العرَق
واقف هناك بيئُوح
كان مين رَسَمْله يروح
نفس الطريق ع الورق ..
باش الورَق و إتحرَق
طيارَه و مرَاجِب
كُل إللججه راكِب
البَحْر بيه إفترق ..
كُل إللججه عايم
كانت نهايئُه العرَق ...



هتحوّل

بياض قلبك
مقاس العين ..
قبول ا لناسعلى الثّيين ..
و حُب مُساعدة المساكين ..
دا كله مسيره يتحول ..
و تتحوّل ..
و ترجع تاني تتسوّل ..
رجوع الناس و تستنّى
هناك مهما البعاد طوّل ...
ياريتنا عرفنا م الأول ..
حاجات كانت هتحمينا
هتستنانا لو غينا
و تتمّانا لو جينا ..
خلاص ..
ما فاضلش شئ فينا ..
و لا دلوقتي و لا بكره
و لا إمبارح
و لا أوّل ..
ياريتنا ما جينا م الأول ..

برج الجدي



من ١٢/٢٢ إلى ١/١٩

بلاش أحسن

ما بين الخافي في الأسرار
هتعرف سير ما يسرّش ..
و من وسط الصُحاب حواليك
هناك صاحب ما بيضُرّش ..
فَما تُمرّش
في وسط الحاجة و تدوّر
و سيب القلب مِتَنوّر
عشان البكره ما تكرّش ..



شئ غامض

تَرْقُب و إنتظار أخبار
يغَيّر كل أحوالك ..
و شئ غامض شاغل بالك ..
يَجُوز شُغلك
يجوز مالك ..
..
هيقُعدُ كله لعيالك ..
و حالك مش عاجبني أكيد
لذلك أنصحك تبدأ
تشوف حظك في برج جديد ...

برج الحوت



من ٢/٢٠ إلى ٣/٢٠

الدنيا مش حظوظ

ردد لنفسك كل شئ
و ما تنسأهوش ..
التذكيرَ واجبه
على كل من جواه طموح
ما وصلهوش ..
إعمل حساب كل إلهي راح
منك عشان ما حسبتَهوش ..
لازم تحوش من سيكتك
كل إلهي كان بيعطلك ..
بطل تأمن للصدف
لجل الصدف ما تبطلك ..
الحظ مش هيوصلك
غير للي إنت وصلته
و طلع فاشوش ..
قبلك كتير ذاكروا الورق
لكههم ما إتعلموش ..
النار بتيجي على الورق و بتحرقه
لكن بتيجي على الكلام ما بتحرقوش ..

أفقي :

واحد : كان مين واقف جنبك

إثنين : لما بيمنح خيرُه ..

/ بنقولها ف وقت ما نتمنى

و تلاته : بيفضل ورا غيرُه ..

/ حرف بيتكرر من ثاني

أربعة : بنعيشُه يادوب حبه

و يمُرّ و يخلص في ثواني ..

الخمسَة : تكافح و تعاني

عشائنه العُمُر ف طوابير ..

لليته : أضيع في المشاوير

و أضيع من عُمري سنين ..

و السبعة : ببسأل و يدور

لو راحت طب راحت فين ؟

رأسي :

واحد : كان واحد مش عايش

أو عايش لكن زهقان ..

/فوتّ ع الموت آخر فرصة

راجع م الحرب و كسبان ..

إثنين : أساطير و بنحكيها

عن حاجة ما حصلتش زمان

..

و تلاته : بيتصاغ في غوايش

أو دبله ف إيد النسيان ..

/لو كان ف عنيك النور قَرَب

بعنيك من أصل الموضوع ..

أربعة : معكوسه من الجوع

/مين إللي يطبطب على إيدك

ساعة ما يشوفك موجوع ..

الخمسَة : البيت المصنوع

من قش لزوم العصافير ..

الستة : نشاور و نودّع

/نتوجّع فنقولها كتير ..

و السبعة : جواب بين

جواباتك

لكن كان جايلك م الغير ..

الحل:

							١
	س		ش	د	ح	م	١
و	ل		ب	هـ	و	ي	٢
ا	ا		ع	ب	ا	ت	٣
ر	م	ع			د		٤
د		ش		ش	ي	ع	٥
	أ		هـ	و	ت	ا	٦
ا	هـ	ن	ي	ف		ش	٧

إشتراطات القبول

أن يكون حاصل على
أصفار كثير..
ويكون معاه
شهادات وفاه
تثبت عليه موت الضمير..
ألا يكون
بطموح كبير..
فاشل قدير..
مايكونش ناصح / فهلوي
لا ينتوي
إنه في يوم
يصبح قوي..
ساذج و خواف
منطوي..
ألا يكون إنسان سوي..

يفهم أوي
في الممنوعات..
لا يُشترط يعرف لغات..
لا يُشترط
وقت الغلط
يندم على كل اللي فات..

..
كل الصفات في الإشتراط..
لازم تكون بالإثباتات ..
شرط القبول بالأولويه
للي عاش
و ضعيه مات..

بريد الجمعة

مالم يكتبه عبد الوهابمطواع

ما بنصّدق

تمُر علينا كام لقطّة من الماضي ..

فَدَنترحّم على الراحه

و ع البال إللى كان فاضي ..

و طيف الذكرى مش راضي

يفارق روحنا و يسبينا

يطوف بينا

يربّي الدمع فى عنينا

و يتعبنا ..

ينسّينا إللى كان لكن

يفكرنا بحبايينا ...

إخترت لكم في هذا العدد رسالة من بين آلاف الرسائل الواردة ، ربما
لأنني شعرت أنها قد تُمثل شريحة كبرى من القراء .. ، بل من البشر
على وجه العموم ..
الرسالة وردت من القارئ (ن . ع) .. و سأنشرها كاملة مع الرد ..
كما سأنشر بعض الردود السريعة لرسائل أخرى وردت هذا الأسبوع
و ذلك في نهاية الباب ..
و الآن .. أترككم مع بريدكم الأسبوعي ..
بريد الجمعة ..

الراسل : ن . ع

العنوان :

بسم إلی جِي علی المداین م القرى ... و إلی إستخبّوا فی الذره ... بسم إلی عاشوا فی العطن - و عاشوا أكثر فی الدرا ... بسم الأميره .. و الأمير .. و الساحره ... بیعت رسالتی من هنا .. مكتب برید القاهرة

الموضوع

نفس المشهد

أنا كل ما اشوف نفس المشهد

بالصوره بنفس الحوارات..

بلاقبني بشوفهم ناس تانيه

بيعيدوا ف نفس الكلمات..

نفس الأشكال - نفس المقاسات..

لكن بتبدل في وشوش

أنا كنت بدور على واحد

قضيت العمر ماشفتوش..

دورت كتير مالفيتهوش

ولا مره ما بين المرّات..

...

أنا عدت المشهد ميت مرّة

وما شفتش أي إختلافات..

بصيت وراك ؟

ولا حاجة م إلي عشقتها إستنتت
ولا حاجة م إلي سألتها حنت
جابوا للبنية لله و إتحتت
غير للي كان القلب رايد بيه ...
ولا حد داري
رايده مين إنك ..

بصيت وراك ؟ ...

طب شفت إيه ؟

غير إلي متفقين عليه

أدي الجمل وادي الحمل ..

و إلي عمل و إلي إتعمل ..

كان فيه زمان حبة أمل ..

لكن ما تبتناش عليه ..

بصيت وراك ؟

و لقيته إيه ..
غير إللي كان بإيدك زمان
و أهو ده إللي كان
دلوقتي فين ..
بصيت وراك ؟
طبشفت مين ؟
"هذا الرجل أيضاً حزين"
الله يعين ..
ع للكرى لما بتسحبك
في كل وقتو كل حين ..
و أحلفكم خمسين يمين ..
و أبصم بروحي ع الكلام ..
بصيت وراك ؟
طب شفت كام ؟
فرصة و ضاعت في الزحام ..
كام حارة
كام سكة ترام ..
و مقام
و سحر و شعوذة ..
كام حاجة م إللي كذا و كذا
أخذت كتير هُك راقات ..

بصيت وراك ؟
و لقيت حاجات
مالهاش عدد ..
كام ماضي كان
كام للأبد ..
كام م الصبايا
و كام بدايه
و كام نهايه و كام ولد ..
كام صخره
كام أحد أحد ..
كام باشا
كام عبد الصمد ..
كام ديب و نعجة و كام خروف
بصيت وراك
علشان تشوف ..
الغلطة كانت في النقط
ولنا الحروف ..
الغلطة كانت في الظروف ..
و أهو كل واحد فيه إللى فيه ..
كام حاجه مئهو كام إليه ...
بصيت وراك
مالقيتش إيه ؟

مش شرط تشوف

قررت تشوفك ؟

مين اللي كسر جواك خوفك

خلاك تتجراً

و تفرق

على زحمة روحك رحمة و نور ..

مين اللي فتح جواك النور ؟ ..

تعبان

مجبور ..

مكشوف

مستور ؟ ..

الدور هيلف يجيب الدور

و هتيجي تشوفك مكسور ...

و تشوفك أحياناً مُذنب

و ساعات هنتشوفك معذور ..

و سطور و بخور

تراتيل و آيات ..

و ساعات بتتموت جواك بالذات ...

و ساعات حواديت

و ساعات حكايات ..
و حاجات جواك ساكنه ف جوفك ..
و حاجات جواك و بتتقسّم ...
و إزاي هتأمن لحروفك
تكتب في الحُزن و تتبسّم ..
تكذب و تغش ..
هتشوفك و إنت بمليون وش ..
هتشوف الدنيا جناح و براح
هتشوفك عِش ..
هتشوف أذار كلها معلش ..
و تشوف الساعه
و شمّاعه
علقت عليها العُمر سنين ..
هتشوفك عيب
و تشوفك شيب
و تشوفك قبل الثلاثين ..
هتشوفك مين ؟
هتشوفك "س"
في سؤال معروف
هتشوفك "ع"
مش عايزه تشوف ..
هتشوفك خوف ..
تعبان .. مكشوف ..

راجع ليه ؟

طب راجع ليه ؟ ..
كان فاكِر يعني هيلحق مين
و هيلحق إيه ؟ ...
و الحقّ على الفايِت ونا
الحقّ عليه ؟
و أنا أصلاً إيه
غير واحد راح و ماجاش منه
غير حبة شيب ..
لقيت في بلاد الله قِسْمَه
و رجعت نصيب ..
و بجيب العُمَر من الآخر
و بسيب الدُنْيا تدور بيّا ..
و بَعيب على نفسي و بجلدها
و بقول في الآخر كان ليّا ..
يا سنين العُمَر يا مرميه ..
قُلْتِلي فـ مرّه هَقْتِيه ..
كان فيّا بواقِي من الماضي
و أنا فاكِر إِيك محبتيه ..
و رجعت لقيت إن الحاضر
كان حاضر لكن بماضيه ..
طب راجع ليه ؟

جيت هربان

إيه إللي جابك هنا !
أمّا غريب يا سؤال ..
بقى ليك معانا سنه
مش داري بالأحوال !
جيتنا زمان تعبان
عيّل ضعيف بشوال
عبيته هم و نوح ..
جيتنا كما الخسران
دوره ف سفينة نوح ..
جيتنا زمان مدبوح
من سيرة الإنسان ..
إيه إللي جابك هنا !!
إنت إللي جيت هربان ..

ردود سريعة

المُرسل إليهم:

تصل لِيَدِ إِبْنِي إِبْتَدُوا
و ما كَمَلَوْش ..
تصل لِيَدِ إِبْنِي إِبْتَهُوا
و ما إِبْتَعْمَوْش ..
تصل لِيَدِ إِبْنِي مَالَوْش
يَدِ فِ أَدَى ..
و العدمانين و العثمانينو الندمانين
و هكذا ..
إلى أن تصل عبر البريد ..
حتماً لإسم المُستفيد ..
أو أي حد
أخذ الكلام يداً بيد ..

العنوان :

كُل الشوارع و القهاوي و البيوت .. كُل المواني و الشطوط .. كُل الغيطان ..
كُل المداخل و المخارج للمكان .. كُل الحيطان إِبْنِي إِبْتَبْت - و بَقْت بيوت
للعنكوبت .. كُل الأماكن و المساكن - إِبْنِي لَسَه رِيحْتها موت ..

(١)

كُل الحروف فيها إعوجاج إلا الألف ..

خليك أَلِف ..

تبقى الوحيد المُخْتَلِف ...

(٢)

أعتقد

بقى أمر واقع .. و إنت لازم تقبله ..

أي شئ بيكون في آخره .. شئ بعيد عن أوله ..

كُل غاية في البداية .. كُل سيرة في الحكاية

كُل عبرة في النهاية

في النهاية بتقتله ..

(٣)

يا كُـل أرض و كُـل شير مشيت عليه

أنا نفسي أعرف

بُكرة هيوصل لإيه ؟

دا الحلم داء فيا و ضاق

و أنا ضقت بيه ..

كُل الرسائل مُرسله

و مُسَجَله ..

الرد ما بيوصلش ليه ؟ ...

(٤)

و ساعات بتمنى كثير إني
أرجع و أشوفني و أنا فسيي ...

(٥)

كل مشاكلي .. إن أنا ما بشوفش الناس شكلي ...

(٦)

جاب ديلئه الفضه .. بس النصيب صدّي ...

(٧)

نضارة م الغامقة .. مع رؤية محدوده ..

كان شئ طبيعي تشوف .. كل الحاجات سوده ..

(٨)

برغم الزحمة جوانا .. هناك دايماً مكان متساب ..

(٩)

و بس يا سيدي في الآخر

رسمنا لنفسنا بواخر ..

سافرنا و غينا و جعنا

لحقنا الفيلم في الآخر ...

(١٠)

ف بحق هذا الورد

بعد السنن و الفرض ..

تجعل طريقنا براح

لما تضيق الأرض ...

(١١)

قافل شبایبگه و ترباسه ..

خسران نفسه

خسران ناسه ..

ما بقیتش الدنيا على مقاسه ..

فد رهنها و أعلن إفلاسه ..

(١٢)

وأهو فارق قبل معاده

و الرحمة تجوز ع الحَيّ ..

حتى لو الموت بالدور

كان دوره هيقي الحَيّ ..

(١٣)

كلنا بنروح لبعيد و نغيب

عاشين بنداري ف نفس العيب

(١٤)

و من دون الصور صوره

برغم العُمر ما نسيناهاش ..

و دون الموجودين في الكادر

مابنشوشي غير إلی مجاش

(١٥)

طب يعني هتفتح تلقاه إيه

غير نفس إلی إنت قفلت علیه ..

مُتوقع إیه ؟

(١٦)

و ساعات بنمئل أحياناً .. إننا أحياناً بنمئل ..

(١٧)

عمّال بتداري حاجات و حنين ..

و هتهرب فين ..

مهما هتبعد .. جايين جايين ..

(١٨)

و كالعادة ..

بتبدأنا الحاجاتسُكر

و تخلص مُرةً بزيادة ..

شافها أسهل م السهولة .. نام بيحسب في الغمولة .. جاب زكبية للسيولة .. مات و هو
في المكان ..

الزمن .. مالهوش أمان ..

عزاء واجب

رايح يكشف
كان عيان ..
راح مطمئن
جه قلقان ..
جاله الدور
طقى النور
نام متكدر
مات زعلان ..

آخر كلام قاله

بعد أما راحوا الناس
و قعدنا نتذكر ..
آخر كلام ليهم
و مزاجنا متعكر ..
لو كُنا بنفكر ..
طب ليه ما سجنناش ؟ ..
مع إته كان واضح
و إحنا إللى مفهمناش ..
يمكن مادقناش ..
ساعة ما قال - ماشي
و حَدَف بآيدُه سلام ..
ماهو كل شئ عادي
و هزارنا كله كلام ..
ليه كل شئ غامض
متداري في الأيام ؟
سابنا ساعتها و قام ..
طب ليه مسلمناش ؟

كُلُّ إِلَهِى قَالِ – رَايِح
كَانَ الْكَلَامُ وَاضِح
وَ إِحْنَا إِلَهِى مَفْهَمْنَاش ..

يَا كُلُّ وَاحِدِ عَاشِ ..
وَ الدُّنْيَا بَاقِيَالِه ..
لَوْ حَذُّ غَالِي عَلَيْكَ
سَجَّلْهُ أَقْوَالِه ..
جَايِزْ كَلَامُه مَعَاكَ
بِالصُّدْقَه بُكْرَه يَكُون
آخِرْ كَلَامِ قَائِلِه ..

خيال الموت

خيال الموت
تملي يفوت في أفكارنا
ساعات من وقت للتاني ..
نفكر في اللي بعد الموت
و شكل العالم التاني ..
هنبقى هناك كبار عواجيز ؟
هنبقى شباب ؟ ..
هنعرف بعضنا لما
هياخد كل حي كتاب ؟ ..
هنتحاسب
في دين و حساب ؟
محدث ساب وراه حاجه
محدث غاب عن المشهد ..
يا خلق الله
ياريت يعني
بلاش على بعضنا تشهد ..
محدث بفضح التاني
عشان الكل كان جاني ..

تسيب العالم التاني
مع الخيالات
خيال الموت عملها و فات
و سابك

بس جاي تاني ..

سبب الوفاة

على سلم الأتوبيس
كان الصراع والع ..
بين رجل ع الأسفلت
مع رجل بتصارع ..
عشانه كان طالع
يلحق مكان وسطهم ..
و الثاني كان نازل
يهرب بعيد عنهم ..
خبطوا فكتاف بعضهم ..
وقعوا من الأتوبيس
بالكشف و التشخيص
حبة خدوش / كدمات ..
سبب الوفاة : واحد
قتله التردد - مات ..

سبعين

كان ماشي يخرف في الشارع
و ينادي "ثمانية و ستين.."
و الناس ماشيين..
اللهم إشفي كل مريض
ع الأرض - أمين ..
ماشي و بينادي النبي آدمين
بطلوع الروح..
كان حبه ينادي و حبه ينوح..
و الروح بتروح
حته ب حته..
بقيته يادوب
ملو جاكته..
كان أطيب واحد في الحته
اللهم إرحم موتانا..
و إجعلهم في الجنة - أمين..
كان واحد ماشي و بيخرف
و بيئده
"تسعة و ستين.."

نعي

بننعيهم .. عشان يمكن بقالنا سنين .. محدش راح سأل
فيهم .. و لو كانوا هم السابقين .. أكيد جاي دورنا بعديهم ..
يا عالم فينا مين بُكره .. يشوف أنهي مصير فيهم ..

طاهر عبد الحي سليم*

إللي فضل ماضيه بطارده لحد ما قتله

زينهم السماحي†

إللي إختصر مصر كلها في قهوة بلدي في حي الحممية

الحاج عباس الضو‡

إللي ساب لعياه حاجات كثير أحسن من فلوس سلامة فراويله

شحاتة حجاج§

إللي مكاتش عايز حاجة من الدنيا غير إخوانه و البت بييسه

* بطل فيلم تيتو - و جسده الفنان أحمد السقا

† من أهم الشخصيات و أكثرها تأثيرا في الأجزاء الأولى لمسلسل ليالي الحممية - و جسده الفنان الراحل

سيد عبد الكريم

‡ مصر كلها عارفة عم عباس الضو .. الفنان الراحل عبدالله غيث في مسلسل المال و البنون

§ بطل فيلم نكان شحاتة - و جسده نوره الفنان عمرو سعد

كام خط على شخطة .. على دايرة على منحنى .. على نقطتين تايهين .. تبقى النتيجة
أنا

بين السطور مسطور خافي الكلام إياه... بين الشروخ مشروخ .. نايبى و
حنينى معاه .. بين الحاجات فى حاجات .. مليانه قولة آه.. بين الـ ما بينو
بين .. مليون ما بين قاسماه ..

نبيل تاني

و كان نفسي
أكون أنا زي ما اتمنيت
و أنا صُغَيْر ..
جرئ نوعاً
برئ طبعاً ..
و لا أبقى طويل
ولا قُصِير ..
نبيل بقى شكله متغَيّر ..

ببزع بعشعره ما شاب ..
و يضحك ببقى تاني شباب ..
و غاب في الدنيا
أد ما غاب ..
و جاب ملو الجيوب غُربه ..

و رحمة عظمة الثرية
ما كان نفسي أكون شارد
ما بين بره و ما بين النيل ..

أنا كان نفسي أكون فارد
إيديا في البراح و الليل ..
و انا مِش حِمل صف طويل ..
نبيل كان نفسه مايكونشي
في دور كاني ولا ماني ..
نبيل كان نفسه م الأول
يكون أصلا نبيل ثاني ..

تم بحمد الله

و آخر سطر في قصيدتي
أكيد لازم يكون إنتي

- هذا الكتاب لا يُمْت بأي صلة لجريدة الأهرام أو مؤسسة الأهرام بأي شكل من الأشكال ، كما أن بعض أسماء الأبواب المُستخدمة فيه هي أسماء أبواب و صفحات من جريدة الأهرام و مملوكة لها.
 - القصائد الواردة في باب (حظك اليوم) مجرد توظيف فني في سياق الشكل العام للكتاب و ليست درباً من التنجيم أو ما شابه. و عن أبي هريرة - رضي الله عنه - قال : قال رسول الله - عليه وسلم - : (من أتى عرفاً أو كاهناً فصدقه بما يقول فقد كفر بما أنزل على محمد) رواه أصحاب السنن وهو حديث صحيح كما قال الألباني في صحيح الترغيب والترهيب ١٧٢/٣
 - للتعرف على المزيد عن جريدة الأهرام ، و عن عدد الجمعة ، و عن الراحل العظيم عبد الوهاب مُطاوع يُمكنك الإطلاع على كل ذلك بالسرد و التفصيل في ويكيبيديا مُستخدماً نفس الأسماء المذكورة.
- facebook: <https://www.facebook.com/nabil.ab7meed>
Goodreads: <https://www.goodreads.com/nabil3ab7meed>
Soundcloud: <https://soundcloud.com/nabil-abd-el-hamed>
- لمُتابعة الكاتب ، و إبداء الرأي يُرجى التواصل عبر الحسابات التاليه :
 - هذا الديوان – "أهرام الجمعة" – هو الديوان الثاني للكاتب ، بعد ديوانه الأول "قانون الدنيا الساخر" الصادر بمعرض القاهرة للكتاب ٢٠١٤ عن دار روعة للنشر و التوزيع .

هذا العمل بالطبع لم يكن ليخرج للنور إلا بجهود و دعم بعض الجنود المجهولين الذين ساعدوني بشكل مباشر أو غير مباشر ، و بالطبع لم أكن لأهمل ذكرهم أو أتناسى دعمهم المستمر خلال الفترة الماضية ..

● زوجتي العزيزة التي تحملت إنقطاعي لفترات قضيتها في القراءة و الكتابة و المراجعة ، و لم تبخل علي برأيها كقارئة ، أو كزوجة تهتم لأمر زوجها.

● إبتنأى العزيزتان أيضاً تستحقان الشكر ، فبسببهما كنت حريصاً ألا أكتب شيئاً أخلج منه أمامهما في المستقبل.

● إخوتي الأعمام و إيمانهم بي منذ البداية كان سبباً كافياً لأن يجعلني أخطو دون خوف.

● الصديق العزيز الأستاذ / أشرف الشافعي ، الذي طالما قدم لي نصائحه المفيدة ، و نقده البناء الذي ساهم بشكل كبير في تنمية إهتمامي بالتفاصيل و بالبناء العام للقصيدة .

● الصديق و الأخ العزيز د. أحمد سمير الشيخ ، الذي لم يتركني لحظة منذ قرابة العام.

● كل الظروف التي مرتت بها و كانت سبباً في ولادة فكرة جديدة ، أو رؤية جديدة لكل ما هو حولي.

بعد مشيئة الله ، هذا العمل أبداً لم يكن ليكتمل بدونكم .. لكم مني خالص الشكر و التقدير ، و أتمنى أن أكون عند حُسن ما ظننتم .

نبيل عبد الحميد

الفهرس

٥٨	سلفي	٥	إهداء
٥٩	طلب أجازة	١٠	جَدَّ عتره
٦١	مذكرات أم حمادة	١٢	حمادة
٦٥	وجهة بَصْر	١٣	على ذكرك
٦٧	كلام معقول	١٤	الشفرة لا تزال في جيبي
٦٨	في ساعته و تاريخه	١٥	يجوز بكرة
٧٠	صورة إنت مش فيها	١٧	التلت و التلتين
٧١	سبئي	١٩	إنبوكس
٧٣	الزنزانة	٢١	يُحكى أن
٧٤	للصورة أصول	٢٣	السوق
٧٥	صورتين زمن	٢٤	آخر خبر
٧٧	اليوم يُقال	٢٨	حارة الأموات
٧٨	مذكرات لم تُكتب	٣٠	الشيال
٧٩	عيد التجاعيد	٣٢	الناس حكايات
٨٠	لسه فآكر فيها إيه	٣٤	عند اللزوم
٨٣	زيارة من الماضي	٣٦	باب الريح
٨٥	مترو	٣٧	بين الطبيب و الدوا
٨٧	زهايمر	٣٨	ياللعجب
٩١	الكنز في الرحلة	٤٠	تايهين
٩٢	الرقص على سلالم الفُمر	٤١	كلام في الفايث
٩٥	و منبه رن	٤٢	الموجة الثالثة
٩٧	رؤيا	٤٤	لم ينجح أحد
٩٩	ولا أي حاجة	٤٥	فُلان إنت
١٠١	بين طايور الخسرانين	٤٦	أخبار سريعة
١٠٢	ساعة الفضا	٤٧	مُرادفات أخرى للموت
١٠٣	تيجي فيك	٤٧	مفاهيم جديدة
١٠٤	نتاج إنسان	٥١	آخر فيش
١٠٥	تدابير	٥٢	للأيد
١٠٦	العبد الفقير	٥٣	آخر باب
١١٠	اختيار صحیح	٥٥	فرق توقيت
١١١	إثنين أنا	٥٦	لسه ما جتس
١١٤	قد صدقت الرويا	٥٧	كل الحكايات
١١٥	عيل كذاب	٥٧	بسط و مقام
١١٨	المجنون	٥٧	الأحد لا يأتي أبدا
١٢٠	فيها إن	٥٧	وعد الخر

١٦٣	يا نصيب	١٢١	كاروهات
١٦٤	ما بنشوفهاش	١٢٢	خلاف قديم
١٦٥	الهروب جائز شرعاً	١٢٤	ضار جداً بالصحة
١٦٦	مش بايدك مش بايدها	١٢٥	بُساط الريح
١٦٧	المسافات	١٢٨	هتودّعه ؟
١٦٨	ما تخاف	١٣٠	زُهد الحاجات
١٦٩	قول يارب	١٣١	الفرار
١٧٠	المفترق	١٣٢	مفيش إثنين
١٧١	هتحوّل	١٣٤	بطاردني
١٧٢	بلاش أحسن	١٣٥	كُنا سبعه
١٧٣	شئ غامض	١٣٨	الضلمة فيها مكان
١٧٤	الدنيا مش حظوظ	١٤٠	اللعب ع المكشوف
١٧٧	إشتراطات القبول	١٤٢	الضحك من غير سبب
١٧٩	بريد الجمعة	١٤٤	إشارات
١٨١	نفس المشهد	١٤٦	هل هي حقيقة ؟
١٨٢	بصيت وراك ؟	١٤٧	كتبتك ليه ؟
١٨٥	مش شرط تشوف	١٤٨	روحين
١٨٧	راجع ليه ؟	١٤٩	و مين عارف
١٨٨	جيت هربان	١٥٠	جيت متأخر
١٩٤	عزاء واجب	١٥١	شبابيكي
١٩٥	آخر كلام قاله	١٥٢	لسه المكان هواه
١٩٧	خيال الموت	١٥٣	أصوم لكن
١٩٨	سبب الوفاة	١٥٤	خلبوص
١٩٩	سبعين	١٥٦	إستعارة مكنية
٢٠٣	نبيل تاني	١٥٨	على المسرح

